

THUTÓ KE ENG

119

BY

MICAH KGASI



THE LOVEDALE PRESS.

1949.

THUTÓ KE ENG

BY

MICAH KGASI



THE LOVEDALE PRESS.

1949.



Bantu Studies Dept
94(1) 1024/58

GO MMADI.

Batho ba gaetsho lona ba le tla balang lekwalônyana le, ke a le dumedisa le go Lo itsise lebaka le le kwadilweng ka ntlha ya lôna. E rile ka e le fa re se na dikwalô tsa ditsô tsa dikêrêkê tsa rona, ka moo re tlhôka kitsô ya botlalô ya go bolella bana ba rona gore : Thutô e tsene jang mo bathong ba ga rona. Mme nna ka bôna go ka tshwanêla gore le nna le fa ke se na kitsô e e kana ka'ng le fa go ntse jalo ke motho, ke tshwanêla go leka go kokona-kokona ka dinala le ka mênô go tlhagisa bonyenyane ja tse ke di utlwileng le tse ke di boneng mabapi le go tséna ga thutô mo bathong ba gaetsho. Mme mo ke tla fosang teng ke kopa gore ke itshwarêlwê ke be ke supediwê tsela ke bona ba ba mphetang ka kitsô.

Leina la lekwalônyana le O le bônang le, le bidiwa *Leloto*. Leloto ké eng ? Leloto gongwe maloto kè ditsiê tse di êtêllang pele matšhwititšhwiti gongwe makgotla-kgotla a Tsiê : E re makgotla ao, a ise a bôname, go bôname mo loaping ditsiê tse di fofang ka ngwe le ka ngwe kwa godimo. Di bôname pila fa O di lebêlêla mo letsatsing ; mme e re batho ba ba bolaiwang kè tlala fa ba di bôna ba itumele ba re : " Tsiê e e-tla banna ! bônang maloto a yôna ké ale kwa letsatsing : A re e ipaakanyetseng re tlê re e goleng re e tlatseng dikgetse le difala tsa bolôkô re tlê re ipholoseng le bana ba rona ka yôna mo tlaleng e ya letshau le ya bojadikata."

Jaanong rona, rona batho ba gaetsho ba Afrika ya Borwa re mo namaneng e tona ya tlala ya letshau ; ga se tlala ya bogôbê mme ké ya go tlhôka kitsô le bothale jago iphedisa : re tlhôka Tswêlêlô-pele, re e tlhokile ka dikete tsa dinyaga. Mme mo sebakeng seno go bôname gore Tsiê ya tswêlêlô-pele e gaufe gobane maloto a yôna a ntse a bôname a e leng dibukanyana tse di ikwaletsweng ké batho ba batsho ba Afrika ya Borwa tse di ntseng di bônabôname fale le fale mo

ditšhabeng tsa batho ba rona tse di supang gore Tsié ya tswélélô-pele e e-tla, e tla ka matšhwititšhwiti a mantsntsi a tlhalefô.

Lekwalônyana le la rona, a le lôna le ke le bê le lengwe la maloto a a supetsang ditšhaba tsa batho ba rona ba Afrika ya Borwa gore : “ Tsogang Lo itokiseng Lo rokê mekôtlâ re utlwelleng o tlhabiwang ké mo-Afrika o o reng, ‘ Bêlê-bêlê-tsieng ! ’ ” mme re tle re golê bommamae ba yôna re tle re iphediseng ka yôna le bana ba rona re tswê mo tlaleng ya boja-dikata re tsênê mo kgoreng ya ditšhaba tsa Tswélélô-pele. Modimo o re thusê !

Mme ke leboga banna ba boikanyô ba ba thusitseng gore lekwalônyana le le kgônê go fitlha diatleng tsa babadi. Mme ke leboga gagolo Professor G. P. Lestrade, M.A. wa “ University of Cape Town ” ka fa a amogetseng a ba a bala ka tlhôkômélô dikwalô tsa me, a ba a naya dikeletsô tsa botlhôkwa, le Morêna Z. K. Matthews, M.A. (Yale), LL.B. (S.A.) wa Fort Hare University College ka moo o itapisitseng go bala dikwalô ka tlhôkômélô a ba a di fetise-tsa go Professor kwa Kapa (Cape Town). Gapê ke leboga Morêna E. K. K. Matlala yo a thusitseng ka dikgakololô gore ke se ke ka lapa mo tirong é, yo e leng ênê a mpule-tseng mojakô wa go itse bathusi ba ba setseng ba boletswe ; gapê Lovedale Institution o thusitse a fetolêla dikwalô mo mokwalong o moša wa Setswana ; le ênê ke mo leboga **thata**.

Banna bao ba boikanyô ke ba leboga mmôgô le mogatisi yo a gatisitseng bukana é, ke ba leboga ka seane sa gaesho sa Setswana, go mongwe le mongwe wa bôna ka re :—

“ Gola O bê kana ka tlou.

Tshukudu mosimane ! ”

Nna motlhanka wa lona,

MICAH KGASI.

Lekwalô lé le kwadilwe ka Sekuena.

(morulanganyi)

TSE DI KA TENG GONGWE LENANÈÔ.

KGAOLÔ YA 1.

THUTÔ KE ENG ?	Tsêbê	1
----------------	----------	-------	---

A : *Thutô ya diaparô :*

Letata la dinku—la dibata—Mokobolwana—
Tatsana—Mesese.

B : *Thutô ya tshipi e ntsho :*

Thutô ya tshipi ya morodu—Kgabô ya
dibaga.

C : *Thutô ya Temô :*

D : *Thutô ya Bongaka :*

Morutwana gongwe ngakana—Bongaka ja
pula (Morôka).

E : *Thutô ya go ithusa ka Legong.*

KGAOLÔ YA 2.

BOPHELÔ JA BOGOLOGOLO JA AFRIKA YA BORWA	17
Modimo O budile mojakô jaanong ?	

KGAOLÔ YA 3.

MOLEMI WA THITÊ GO E DIRA TSHIMO	23
----------------------------------	----

KGAOLÔ YA 4.

BARERI BA LEFOKO BA TLILE JAANONG ?	26
Moreri wa pele wa Evangedi mo ga Mogôpa—	
Moreri wa bobedi wa Evangedi mo ga Mogôpa—	
Tirô	

Tsêbê

Ya Davide Modibane—Baruti ba pele ba Bakwena
Ba ga Mogôpa—Thutô kwa Matlhare—Khudugô
kwa Matlhare—Kgabalatsane—Molekô o mogolo wa
wa tumêlô.

KGAOLÔ YA 5.

THUTÔ YA TSWÊLÊLÔ-PELE (EDUCATION) 43

Tswêlêlô-pele ya ditirô (Civilization)—
Molemô wa thutô—Dira tsa thutô : (a) Setshaba
(b) Marêna (c) Baruti.

KGAOLÔ YA 6.

LEKGOLÔ LA DINYAGA 52

Kgaoganô ya Dikérêkê—

KGAOLÔ YA 1.

THUTÔ KE ENG ?

Thutô ké go naya kitsô mo e neng e ntse e se teng.

Mo metlheng ya bogolo-golo, fa batho ba Basweu ba ne ba ise ba tle mo lefatseng la rona la Afrika ya Borwa, rona batho ba Batsho re ne re ntse re na le thutô e e thusitseng ditshaba tsa rona go phela mo gareng ga makete le dipitlaganô tse bo-rra-rona-mogolo le bo-mma-rona-mogolo ba fetileng mo go tsôna, go fitlhêla ba Basweu ba be ba tla ba di fitlhêla di ntse di le merafe di phela. Sé se di thusitseng fêla ké yôna thutô e bo-rraetsho-mogolo ba neng ba ntse ba na le yôna. Ba ne ba na le thutô ya go lema le ya go itirêla diaparô, le go itirêla tshipi e ntsho le e tshêtlha, tse di ba fetogetseng thusô e kgolo thata.

A : Thutô ya Diaparô.

Ke tla simolola ka dikobô tsa bosigo.

Letata la kgomo ké kobô e e aparwang bosigo fa go robetswe. Go ne go tsêwa letlalô la kgomo e kgolo le falwe ka phalô le ntse le gasiwa ka metsi, e le gore le fokodiwê bokete le tle le dumêlê go sugiwa. Mme e re fa le fadilwe go ntshitswe ditlhono di ile go jewa, jaanong le tshelwe metsi gapê le ngwaelwe ka matlapa a a magwata a a bidiwang mangwaêlô. Go nne go ngwaelwe go ntse go noniwa ka metsi go tsamaya letlalô le fenyêga le nna bolêta. Jaanong le sugiwa ké banna ba le dikaganêla ba le thukhutha ba etsa ditau fa di gagoganya phôlôgôlô, ba le ubulana, ba le gata ka dinaô. Bofelong letlalô le lôna le bôna gore ga go ka gosele fa e se go inêêla mo thatong ya basugi go nna bolêta le go dumêla go aparwa le go bidiwa kobô e seng letlalô. Mme jaanong le tlodiwa ka bobôkô le bêwa gore e re motlhang le tshwarwang gapê ka diatla le butswê

le nnê boléta-léta. Jaanong le batlélwa mosegi a le sega a le roka. Ga e tlhole e le letlalô, mme ké kobô ya ntlo jaanong, ké letata la kgomo. Mme e re ka bobôya ja kgomo bo le bokhutshwane mme bo se borithô, e ne e re le fa letata la kgomo le le teng, go nne go batlege gore go be teng letata le lengwe le lôna le le nang le bobôya jo bo borithô ; e le gore e tle e re fa seramê sa mariga se gaketse, go tle go apesiwê lôna letata le le borithô ka fa teng, mme la kgomo le apesiwê ka fa godimo, mme seramê se tlhôkê go tsêna fa matata a mabedi ao a apesitswe ka mokgwa o o setseng o boletswe.

Letatu la Dinku : Fa go diriwa letata la dinku, go ne go tsêwa matlalô a dinku a a ka neng a tshelêla (6) gongwe go feta moo ; go ne go ya ka fa mong wa kobô o e ratang bogolo ka teng. Mme e re ka gobane ôna matlalô a dinku a se na bokima jaka a dikgomo ka moo ôna ga a ke a falwa ditlhono, mme a ngwaêlwa fêla mme a sugiwe ka diatla a be a nne bolêta jaka lepai la kajeno la sekogwa. Jaanong go batlege setswerere se segolo sa mosegi. Gobane matlalô a mantsi ao, fa a tshwanetse go segwa a ba a rokagangwa a dirwa kobô e le ngwe, ga se mang le mang yo a ka kgônang modirô oo. Ke bile ke gopola gore ké gôna kwa go duleng seane sa bo-rrê se se reng :

“ Magogorwane rokêla banneng,
'Tsiba sa kobô se tlala
Ba se Go gakololê.”

Mme fa mosegi wa setswerere a gorogile e bile gongwe a tswa go bidiwa kgakala, jaanong matlalô a bipiwe ka mmû-têle le fa e le ka moroko gore a boêlwê. Fa a boetswe, mosegi o a atamêla ka thipana e tshwaana ya se-Afrika e e magale ka gotlhe e e lometsweng mo dikgatlheng tsa legong gongwe tsa lenaka e e bolokwang mo selateng sa letlalô. Ka yôna eo, o sega matlalô ao, a a dira dikapetlakapetla tse di tla tlhomagangwang go dira bolele ja kobô. Mme palô ya matlalô a e ka reng fa a tlhomagangwa ya dira bolee-

le ja kobô, e bidiwa, "Tlhôgô." Mme letlalô le lengwe le bidiwa "Letlhare." Jalo matlalô a mararo ké tlhôgô e le ngwe, a tshelêlang ké tlhôgô tse pedi, jalo jalo.

Fa matlalô a segilwe a bile a kôpantswe ka ditlhale a nêwa baroki, bangwe ba roka tlhôgô e ngwe ba bangwe e ngwe, mme fa ditlhôgô di rokilwe, go tla kôpangwa ditlhôgô tse tsotlhe mmôgô. Mme matlalô a mantsi ale, a fetotswe l-tata la kobô ya dinku e e borithô e ntlê.

Letata la Dibata : Dibata tse di neng di dirwa letata, go rêwa bogolo dipela ; mme tirô ya go dira kobô eo, e batla e tshwana fêla le ya dinku. Mme e re ka dipela di le dipôtlan go dinku, mosegi wa tsôna o batlêga kitsô e e fetang ya mosegi wa dinku. Jaanong bo-Magogorwane ba se ké ba tlhole ba atamêla, go diragala seane sa bo-rrê se se reng :—

"Masianyane tshabêla moriting

Selemô go disa bo-Rabatho."

Jaanong setswerere seo e leng sôna Rabatho, se tla sega ka makhêthê a magolo, a kôpanya matlalônyana ao, ka dikgemethenyana tseo go thweng matlalwana a dipela, a di dira namane e tonâ ya letata la kobô ya dibata.

Ka ga dibatana tse dingwe e ne e se tse tsotlhe tse di neng di ka aparwa ké mongwe le mongwe, tse dingwe ké tse molaô wa se-Afrika o nong o di abetse borêna ja Afrika ; e bong : Nkwê, phokobyê, methlose, le tshipa. Tseo tsôna fa O di bolaile, O tla re go di suga Wa dirwala Wa di isakwa kgosing, mme kgosi e Go leboga ka kgomo ; fa O sa dire jalo, O itlhôkômêlê e se re gongwe tsa fofa di Go kgoshe

O lemalê O jê ditsiê
Dintlhwa di begwa kgosing.
Ke kwadile ka ga dikobô tse di aparwang bosigo fa go robeswe. Jaanong ke tla leka go bua ka ga tse di neng di aparwa motshegare, le tsa go ikgabisa.

Mokobolwana : Mokobolwana ké kobô e e neng e dirwa ka letlalô la kgongwana : e ne e aparwa ké banna, gobane masogwana le methepha ba ne ba sa apare kobô, fa e se fêla ka malatsi a pula gongwe a phefô. Ba ne ba kaya fa e le ditlhong gore motho yo moša a aparê kobô motshegare a sa lwale, Awî !

Morêpô : Morêpô ké kobô e e neng e aparwa ké basadi ; mme fa ba e apere ba ne ba atisa go e ntsha ka legwafa, ba ntshetsa letsôgô le lengwe kwa ntlê. Le yôna e ne e diriwa ka matlalô a a neng a dira dikobô tse ke setseng ke boletse ka ga tsôna.

Tatsana : Tatsana le yôna ké kobô ya bahumagadi ya mokgabô e ne e kgabiswa thata, mme a dirwa ka letlalô la nônê.

Ditswalô : Banna ba ne ba tswala "tshega" gongwe "moaswana." E ne e dirwa ka letlalô la phuduhudu gongwe la phuti mme le ka a mangwe matlalô e ne e dirwa mme tse di neng di ratêga bogolo e ne e le phuduhudu le phuti. Mme ba ne ba suga mogodu wa kgomo bolêta go nna jaka lesela, mme ba itirele mahunêlô a moaswana a mantlê ka ôna, ba a bitsa "Motlhantshu." Gapê ba ne ba itirêla setswalô se sengwe se se bidiwang "Sefega." Se ne se tswalwa ka fa moragô se apesa maragô. Se ne se dirwa ka letlalô la nônê mme se ne se bidiwa motatsana.

Mesese : Basadi bôna ba ne ba tswala mesese, e le wa pele le wa moragô. Mme le yôna e ne e sa tshwane gapê e sa lekane. Wa pele ó ne ó le mokhutshwane ó sa apese mangwele. Mme wa moragô ôna ô le motelele ó tshwara ditlhako. Ya pele e ne e le kwana le phalana le mporiane. Le gale e mengwe le fa e ne e le teng, e ne e ka se ke ya kaêga bogolo go e e setseng e boletswe ka maina. Kwana le phalana di ne di tswalwa ka malatsi a melêtlô ; mme mporiane e ne e le wa ka malatsi otlhe a ditirô. E ne e a re fa dikwanyana di golagodile di bile di amule pila, le bobôya

ja tsôna bo tagile bo le bontlê, go ne go tle go bidiwe mohumagadi le fa e le morwadie le fa e le ngwetsi gongwe setloggolo fa se ile go maloma-sôna mme se isiwe kwa lesakaneng la dikwana fa di eme mo teng a di lebe a itshenkele kwana e e nang le mmala o o mo kgatlhang—mohumagadi gongwe mohumagatsana—mme a supe a re : “ Ke rata kwana ele.” Mme mosimane a tsene a e tshware e isiwe kwa lapeng e tlhabibi, mme letlalô la yôna le sugiwe le batlelwé mosegi a le sege ka maatlametlo a magolo. E be e re fa go se na mosegi gaufe, go rwalwe ditlhako go ye go batlwa kgakala : gobane ga se yôna kwana ya molétlô e ka segwang ké bai-thuti, bo-Magogorwane, mme e batla basegi ba nnete, gore e re fa mohumagadi a e peremeditse mo lethekeng, go be go tshwanelege gore go tsêna semangmang, go tsêna mogatsa’

Lefatlha la bo-Mmategi
Letsubu-tsubu la mafatlha,
Phefô e fatlhile ditlou selemô
Selemô ka kgwedi ya Mathhabanaga ;
Nna mmê ga nkiletse ke bôkwa,
Wa nkítse ke Legapa tshunyana
Ke Legorosa tshwana,
Ke tla le kgwana ya meriti ya mabyê
Ya meriti ya mabyê a bo-kgongwane ;
Radiphathlane wa ba ga kolonyane
Se pšhe kgomo setshôtlhô Radiphathlane
Sé se monate se a mediwa Keketsi.
Motho kwa Mmamonne tsopane
Ó godile Mokukutlêla
Ké modimako wa bo-Mmamoenyana.
Ngwana wa dikgomo di rile di bofeletse
Ke sa tlhole ke feleka di huneletse
Di bofeletse ka kgôlê ya dikgong
Di bile tsa tsaya basadi tsa loka :
Ya re ngwana wa dikgomo ka bula lebaka
Ka gana di tshela noka ya Tolwane

Ka sala ke soka-soka Letêbêlê,
Ka re : " Nala ! Ya gae re laelane
Re laelane ka legata la motho—
Ka legata la motho wa ga-Sebitiele."

Phalana le yôna e ne e le mosesê wa moletlo, wa mokgabô jaka wa kwana.

Mosese wa moragô o ne o dirwa bogolo ka letlalô la pudi le le fadilweng bobôya mme le sugilwe bolêta, mme le ôna o no o batlêlwa basegi ; o ne o bidiwa " Mokutwane." O mongwe mosesê wa moragô e ne e le " tshêphê." Ôna o ne o se ke o falwa bobôya o ne o sugiwa o be o segiwe o ntse o na le bobôya, moêtsê e be ôna kgabisô ; e re fa o fedile go rokwa mme o tshwanetse go bolokwa, o batlelwe legogô o thathiwe ka lôna o bofiwe thata gore moêtsê o golafadiwê ké go bofiwa jalo. Mme e tle e re ka tsatsi la moletlo, fa mogatsa gongwe morwadi, a Semang-mang a tsêna mo mosakong wa pina, go be go bônagale gore go tsene ngwana wa batho wa ga

" Tlou e kwa Mmamonne tilodi
Ga ya gola e otlaotlegile
Kwa dinakeng e isitse bogosi
Ya isa dinaka Tlou ya phaka,
E tswe e le tlou ya Marêna
E le tlou ya bo Rakgwaba le Megobeng."

Kana batho ba Setswana e ne e le batho ba ba ithatang. Ngwana wa Morwetsana wa bôna fa a ne a ikgabisitse ka dikgabisô tsa se-gagabô tsa Setswana, o ne a lebêga bontlê thata, fa e neng e be ekete fa O ka mo ama fêla ka seatla O ka mo kgôtlêla, Wa mo silafatsa, ka ntlha ya bontlê jo bo neng, bo bônalà mo go ênê.

Basesana bôna ba ne ba tswala makgabe a a neng a otlhiwa ké basadi ka lodi la bogôkgwê. Bogôkgwê ké segwere se se imelêlang mo nageng. Mme basadi ba ne ba

kumola metlang ya sôna ba e apee ba e tlathswe, mme go tswe lodi le lesweu le le bolêta le le thata mme ba dire ka lôna makhabe a bo-morwadi'a bôna, mme le basadi ba e sa leng betsana ba ne ba a tswala. Gapê le mahunêlô a ditshega tsa dialogane a a bidiwang matlhaga a ne a logiwa ka lôna lelodi leo, mme a kgabisewe ka dikgôtlhwana. Mobadi a utlwê gore diaparô le ditswalô tse dingwe di sa le teng tse di sa kwalwang mo bukaneng e, mme tse di kwadilweng ke itlhoma di lekane go bontsha motlhala wa thutô ya ba-Afrika ya diaparô le ditswalô.

B : Thutô ya Tshipi e Ntsho.

Mo metlheng ya bogologolo go ne go se na mabenkele kwa motho a neng a ka ya go rêka dilô tsa tshipi tse a di tlhôkêlang go ithusa ka tsôna mo bophelong jo bo makete ja dipaka tseo. Mme Modimo o o tlamêlang dibopiwa tsotlhe tsa Ôna, wa naya ba-Afrika bathudi go itirêla tshipi ka matlapa a lefatshe la bôna. Ba e dira ka mokgwa o :—

Ba êpa matlapa a a bidiwang “ Borale,” mme ba a thuba bosesane gore a tle a utlwâlêlwê gongwe a fengwê ké bogale ja mollô. Ba êpa mosima o o seng boteng mme ba bopa ka letsopa pitsa mo mosimeng oo, pitsa yeo e bidiwa “ Leuba.” Mme ba dira masoba mo matlhakoreng a leuba, kwa tlase ga leuba go dirilwe mesêlênyana e e tla reng fa tshipi e tlaphoga ya êlêlêla teng ya bopêga jaka yôna, mme ba dira dikgetse tsa mohuta ka matlalô ba di bitsa “ meuba.” Mme di na le molomo o athlameng o o rokeletsweng mo dithôbaneng tse pedi tse ya reng fa di bulwa go tsene phefô. Mme fa di tswalwa phefô e tswe ka lesoka le le kwa tlase le le bofeletsweng lenaka la phohu le le lesoba kwa ntlheng ; mme meuba e thêgwa mo tikologong ya leuba e supile ka dinaka tsa diphohu mo masobeng a ke setseng ke a boletse. Jaanong go tshêlwa matlapa mo leubeng a tshêlwa le magala a monatô, ké go re dikgong tse di neng di besitswe tsa tingwa ga sala dipilô ; mme dipilô tseo ké tsôna di bidiwang magala, mme di tshêlwa le matlapa a a thubilweng mmôgô

mo leubeng, mme go tséngwa mollô. Jaanong ga simolla modirô o mogolo wa go dira tshipi.

Dinatla tsa banna tsa tshwara ka atla tse pedi mongwe le mongwe a khubame fa gare ga mueba e mebedi a uba ka mabôgô a mabedi e bile ekete o gama kgomo ya letlhabula go le thata go sitisa letlapa. Mothudi (mong wa modirô) a tlola-tlola le bôna, ba fufuletswe, a pôtapôta a tshwara se, a tshwara se. E bile mo sebakeng seo mathaka (barutiwa) ga ba sa dumêllwa go ya le kwa malapeng a bôna, ba upilwe. Fa mollô o batla go bôtla, o ntse o okediwa magala. Bofelong matlapa a fengwa ké kganare ya mollô a tlaphoga, tshipi e a kgaogana le mannyêlô a élêlêla mo mesêlênyaneng e e diretsweng yôna, mme ya fôlêla teng e bopegile ka fa sebopegong sa mesêlênyana e e baakantsweng ké mothudi. Jaanong ké thabô, tshipi e diregile. E ka diriwa digale tse tsotlhe tsa tshipi, e bong :—megoma, dipêlwana, dilêpê, marumô, diphalô, dimaô, dithipa, dinôtô, matlawa, mabê-kô, dikgare, ditongwane, medirô, le tse le tse.

Thutô ya tshipi ya Morodu : Tshipi ya morodu le yôna e ntshiwa mo matlapeng jaka tshipi e ntsho. Mme ka ntlha ya bontlê le bolêta ja yôna, batho ba rona ga ba ka ba itirêla tirô epê ka yôna fa e se fêla go kgabisâ mebele ya bôna ka yôna. Ba itirêla mapetu, mefitshana, dikgotlhwa-na, manyena, masêka le tse le tse. Fa go dirwa mapetu, go dubiwa serêtsê sa mmu o o borethe, e re fa ekete o a swaba go tsêwa thôbane e e rethefaditsweng, e e dirilweng tekanô ya lepetu, mme e somelwe mo mmung oo ; mme fa e somolwa mo go ôna e tlogêla lesoba le le tshwanang le lepetu. Mo lesobeng leo go tshêlwa moredu o o tlaphositsweng, mme fa o fôla mo lesobeng o a thema, mme o somolwe o gotlhiwe o phatsimisiwe o kokoropiwe mme o twesiwe mo molaleng wa mohumagadi mme e nne kgabisô e kgolo ya tlotlô mo go ênê. Tse dingwa di diriwa bose-sane mme di bidiwe mefitshana dirwalwe mo molaleng le mo maotong le mo mabogong. Gapê ba ne ba itse go gôga

yôna tshipi ya morodu ba e dire bosepane ja tlhale, mme ba e bitse "Bothale," ba dire ka yôna manyena a ditsêbê le masêka le dikgôtlhwana.

Mme le yôna tshipi e ntsho ba ne ba ithutile go e gôga go e dira bothale jaka morodu. Ke gopola gore ké gôna fa go tla tswa seane se se reng,

Tsholetsa mo-loga-ledile
Nna mo-loga-tshipi ke feditse.

Thutô ka ga tshipi mo bathong ba batsho ba Afrika ya Borwa e ne e dirisiwa jalo ka boîma jo bogolo ; mme le fa go ntse jalo e ba thusitse go be go tle go fitlhê yo mosweu a ba fitlhê ba ntse ba le ditshaba le merafe ka yôna thutô yeo ya bôna, le fa ba ne ba se na dikolo le barutisi jaka ba Basweu.

Mekgabô ya Dibaga : Dibaga e ne e le kgabisô e kgolo mo bogologolong ja rona. Mme tsôna ba ne ba sa itse go di dira ka nosi, ba ne ba di rêka di tswa 'sobeng la Botlhabsatsi (Kwapeng). Ké ka moo go bileng ga bolêlwa seane ga twe :—

" A O rata dibaga tsa Malokwane
Malokwane O sa a rate ? "

Bahumagadi ba ma-Afrika fa ba ne ba ikgabisitse ka botlalô ka dikgabisô tsa bôna, go ne go kganya kgalalêlô ya tshipi le ya dibaga le ya sebilô mo ditlhogong go bile go bônala gore e fêla e le bôna.

Mašopyana a ii oo !
Di ya nokeng di bolêla
Di be di boe di bolêla.

Ke buile ka ga thutô ya diaparô le ya tshipi e ntsho, le tshipi ya morodu le tse di dirwang ka tsôna le dibaga. Jaanong ke tla leka go tswêlêla pele ka go bua ka ga tse dingwe dithutô.

C : Thutô ya Temô.

Baagi ba Afrika yaBorwa ba ba bidiwang “ Bantu ” gongwe “ Batho ” ba ne ba ithuthile go rua dikgomo le go lema mabêlê. Ba bile ba tlhaba seane ba re :

“ Monna thupa di maphata
O disé dikgomo O lemê.”

Ba ne ba itiretse mogoma wa tshipi o ba neng ba khatha thitê ka ôna. Mme ba dire masimo, ba jale ba kotule, mme ba bolokele mabêlê a ba a kotutseng mo sefaleng sa mmu se segolo se se bidiwang “ Letlole,” se se neng se ka ôlêla dikgetse tsa kajeno tse di ka nnang masomê a mararo, go ya go a matlhano le go feta. Gapê ba be ba na le difalana tsa bolôkô tse di ôlêlang e ka nna kgetse ya kajeno go ya go tse tharo le go feta. Dipeo tsa bôna e ne e le mabêlê a masweu le a mahibidu, le lebêlêbêlê le maphutshe le maraka le magapu, le maowane, le dinawa le ditlhodi le ditloo, le ntshwê le ditlhawo le motsoko. Mmopo ôna o tlie le ba Basweu. Mme ba ne ba na le pêtlwana ya tshipi e ba neng ba tlhagola ka yôna meférô mo masimong ao a bôna. Ba ne ba rêka dikgomo ka mabêlê a ba a kotulang mo masimong. Mme tirô ya go lema e ne e dirwa ka makete, gobane, kagisô e ne e tlhôkafala mme mokgosi wa tlhabanô o lela bosigo le motshegare, le ditau di iphetotse dira tsa batho. Go utlwagala motshegare mokhosi o o reng, “ Sebata-kgomô ! ” E re fêla fa o utlwala banna ba be ba tsaya dithêbê le marumô ba phallêla kwa mokgosing, mme ka tsela e basadi ba sala le ditirô tse tsotlhe tsa kwa masimong. Gapê le mo malatsing a mokgosi o sa tlhabiwang, diaparô tsa lapa di tshwanetse go batlêga mo go ênê monna Ó a tsoma, o a ngwaêla, o a suga, o a roka. Mme le fa a ka nyala basadi ba bantsi, tsôna diaparô tsa malapa a otlhe a gagwê di batlêga mo go ênê monna, a bile a ntse a utlweletse mokgosi o tlhabiya a latlhanya tsotlhe a rakantsha mokgosi.

D : Thutô ya Bongaka.

Jaanong re fitlhile fa bothateng gobane jaka go ntse mo ditšhabeng tse tsotlhe tsa batho ba lefatshe lotlhe, ngaka e le motho yo mogolo ka gobane go sololetswe mo go ênê bophelô ja batho le ja bana ba bôna le ja maruô a bôna le ja lefatshe la bôna, go ne go ntse jalo le mo bathong ba lefatshe leno la Afrika ya Borwa. Ngaka e ne e le ênê motho yo mogolo gobane go dumélwa gore o nonofile go fodisa malwetse a otlhe, a a tsêñang ka nosi, le a a tsengwang ké baloi, a bile a ka busetsa bolwetse kwa go ênê moloi yo o neng a bo tsentse mo mothong. Gapê a ka néêlêla motho bolwetse ka ditlhare a ntse a le kgakala. Gapê a ka thibêla tladi le gôna á ka fofa ka nosi a itira tladimothwana. A ka thêa ntlo, lesaka le tshimo ka ditlhare gore dikotsi le ditlalêlô di se ke tsa tsêna teng, mme matlhôgônôlô ôna a nnê mo mafelong ao a a theilweng. A ka kgaa naga, a ka foka marumô gore ôna marumô a a fokilweng a nonofê mo direng mme e re marumô a dira ônê a koafalê. Gapê fa go tsamaiwa mo mafelong a poitshêgô, ênê ngaka a ka thiba matlhô a dira ka "Diragadibonwe," mme go fetwe mo gare ga dira, mme tsônen di se ke di bone.

Fa sengwe se ka latlhêga le fa e ka nna dikgomo, dinku, dipudi gonwe motho, sengwe le sengwe se se ka latlhêgêlang batho, ngaka e ka latlhêla ditaola fa fatshe mme di ka senola se se timetseng. Gapê fa tsiê e tla ka matšhwiti-tshwiti a magolo go senya mo masimong, ngaka e roma mosimane a ya go e mo tsêela, mme fa e fitlhâ o e jesa ditlhare, a e busetsa kwa go e ntsi, fa a fitlhâ o e latlhêla godimo e fofa le tse dingwe, mme fa e tsêna mo go tsôna, ditlhare tse di jesitsweng e e neng e tshwerwe, di tla dira gore tsiê yotlhe e fofêlê godimo e tlolê masimo e sa senye sepê.

Fa thaga gongwe seboko se senya mo masimong, ngaka e tla upa ka ditlhare go thiba melomo ya tsôna gore di se ke tsa ja mabêlê. Go ne go dumélwa gore ngaka e na le dithata tse di ntseng jalo. Mme batho ba bantsinyana ba

ne ba ithuta thutô ya bongaka gore ba tle ba lekanê go dirê-la ditshaba tsa bôna, le go ipatlêla leroû le tlotlégô mo bathong.

Morutwana gongwe Ngakana : Motho yo a neng a ithuta bongaka o ne a bidiwa ngakana. Mme o tshwanetse go rutwa ké yôna ngaka, Mankge, Thotéladiêma. Ènê ngakana o tshwanetse go tsamaya le ngaka a dira medirô ya bongaka gore a ithute ka go bôna ka matlhô, ka go utlwa ka ditsêbê, ka go tshwara ka diatla. Ó tsamaya le ngaka a rwele merwalô e megolo ya ditlhare tsa ngaka. Ó rongwa go êpa ditlhare, o rutwa go itse maina a tsôna le metlang ya tsôna, ké ênê yo a dirang medirô ya bongaka. Fa go tlhabiba "Sedimo," ké ênê yo o e tlhabang le go e bua, le go e apaya. Fa go alafwa molwetsé ké ênê ngakana e e tshwanetseng go mo tshwara-tshwara, go mo nosa ditlhare, go mo phatsa, go mo tlotsa, ngaka e kgolo yôna e ntse e bolêla fêla ka molomo se se ka dirêwang molwetsi. Fa go thêwa ntlo ké ênê yo o dirang dimapô le go di kokotêla kwa di batlêgang teng. Mme o tlhokometse thata gore a di ithutê a be a di itse ka botlalô, gobane ké tsôna tse e tla reng ka mosô fa e le ênê mankgapane (ngaka e kgolo) a dira tsôna. Gapê a rutwê go itse ditlhare tse di se nang kotsi le tse di nang le kotsi. A itse tekanyô ya ditlhare tse di ka tshogang di tlhagisa kotsi fa di sa néwa ka tekanô. A itse tse di nowang le tse di tlhabêlwang le tse di tlodiwang le tse di sunedisiwang., a be a itse le tse di aramediwang, mme fa ngaka e bone gore ngakana e a tlhaloganya, e tla mo roma go ya go alafa molwetsi. Mme fa e bone gore o a kgôna, e mo leka gore a o tlhaloganya ditaola, a o itse maina a tsôna le mehuta ya tsôna, tse ditonanyana le tse dinamagadi ; a o itse mawa a tsôna le go tlhaloganya se mawa ao a se bolêlang. Mme fa a feditse dithutô tse tsotlhe tsa bongaka, jaanong ngaka e e mo rutileng e tla mo ntsha ka "mogodu" a néwa bongaka jo bo tletseng. Go ntsha ka mogodu, ké jaka ba Basweu fa ba itumedisitswe ké

morutwa, mme ba bone fa a feditse thutô tse a neng a di rutiwa, ba mo naya lekwalô le ba le bitsang ka leina la “ Certificate.”

E re ka ke setse ke amile tsa ditaola le tsa mawa a tsôna, ke tla leka go tlhagisetsa babadi ba rona mawa a mangwenyana go bontsha ka ôna tsela ya go bôka mawa a ditaola tsa bagologolo ba rona ba Afrika ya Borwa. Tsôna ditaola lebôkô la tsôna ké :

Kgagara tsa metsi a pila
Di kokonwa ké mpša tlhaba
Di ôlélwa matlakaleng
Marapô a tse di suleng
Malaola di tsamayang.

Ditaola di betliwa ka marapô gongwe ditlhako gongwe dilô disele. Dingaka di bolêla gore ditaola di a bua le go senola tse di sa itsiweng. Fa motho a lwala, di bolêla bolwetse, di be di supe kwa bo tswang teng, gapê di supa le setlhare se se ka bo alafang. Di supe fa e le bolwetse fêla gongwe e le boloi. Go bua ga tsôna ké mokgwa o di wêlang fa fatshe ka ôna, mme go wa moo go bidiwe “ Lewa ” go twe : di ole lewa la gore le gore ; jaka go ka twe :—

- (1) Tlhôgô tshweu rwala diala
Le makola O rwalê a tlhôlô,
A mmutla a magatana
A re : bosweu ; a re : botsho, jalo-jalo.
Leo lewa le supa letlhôgônôlô go yo o laolwang.
- (2) Batho Le akêla malala
Le gata mosêtlha mosole
Morérô selô Le se itse.
Mong gae wa molotsana
'Botla leswa ga laole o sia bola go mo ntsha.
Leo le bolêla gore kotsi é, ga e tswe kwa kgakala ; molato o ka fa Iwapeng
- (3) Segolobê sa Makgolêla
Sa ga ke ntse ke rutubetse

Ke na malomê ke na rarê
Ke na tsapa le mphisang pelo ;
Phôlôgôlô ke a e bolaya
Ke e je mosadinyana 'a ga ka.

Leo lewa le supa kagisô.

- (4) Moruphi wa ga Kubêla, Kubêla
Go tsene matsepe,
E re matsepe a tswê le madi ;
Na o ka re tshêrê thamagana
Lenaka teng ke tlhabile.

Leo lewa le bolêla gore kotsi e teng e kgolo.

- (5) Thagadima ya Marutla a kôma
Se ileng se ile
Se ile mosima mothâela thupa
Mosilo ké mo-se-lateledi.

Leo lewa ké le le bolêlang tatlhêgêlô.

Bongaka ja pula (*Morôka*) : Ke boletse ka ga bongaka ja malwetse mme jaanong ke tla leka ka ga ngaka e e alafang maru gore a nesê pula. Ngaka eo e bidiwa "Morôka." Morôka ka e le ngaka ya maru o itse dilô tse di thusang maru le tse di a senyang, mme le fa ênê a phuthile maru, a ba a lokisa go nesa pula, maru fa a fitlhêla lefatshe le na le tse ôna a sa di batleng, a tla gana go nesa pula go fitlhêla lefatshe le itshêkê pele.

Mme morôka o tshwanetse go roma basimane go phutha tse di sa utlwaneng le maru tse e leng "Dibêêla" ; mme madira ao a Morêna Morôka a tla sêla eng le eng tse di kileng tsa tsholwa ké batho. Dikgêthê tsa dikobô, dikgaketla, ditsiba le sengwe le sengwe se Morôka a se kaileng gore ké sebêêla, mme di isiwa go ênê, mme ênê o tla itse se a ka se dirang ka dibêêla tseo. Mme moragô o tla laola gore go tswê letsholô le yê go tsoma diphôlôfôlô, mme fa letsholô le tlisitse diphôlôfôlô tseo go ênê jaanong modirô e tla sala e le wa gagwê fêla, o tla dira gore maru a nesê pula go thusa lefatshe. Mme e tla re fa mabêlê a kotutswe lwapa

le lwapa le tla batlêga go ntsha seroto sa mabêlê go leboga morôka, gobane o phedisitse setshaba ka go se nesetsa pula. Wêna mobadi O leng motho wa sebaka seno se go itsiweng pula e nesiwang ké Modimo fêla, Wa re'ng ? A le Wêna O leboga Modimo o o Go nesetsang pula ya tsa mmele le ya tsa môya ka seroto ?

E : Thutô ya go Ithusa ka Legong.

Lefatshe la rona la Afrika ya Borwa le na le ditlhare le dikgwa, mme batho ba gaetsho ba bone thusô e kgolo ka tsôna ditlhare tseo tsa lefatshe la bôna. Ba ne ba na le selêpê se ba se itiretseng ka tshipi é le yôna ba e itiretseng ka matlapa a lefatshe la bôna. Mme ka sôna selêpê seo, ba ne ba ithutile go rêma le go bêtla tse ba neng ba ithusa ka tsôna mo bophelong ja bôna. Ba ne ba ikagêla matlo le maraka a diruiwa tsa bôna ; mme ba itse go ipêtlêla dijana le mefinyana ya digale, tse ba neng ba dira medirô ka tsôna, jaka tsôna dilêpê, le megoma, le marumô le dipêtlwana, le diphalô le tse le tse. Gapê ba bêtla melamu le metshe e e setlang mabêlê le dikatô tse di phôthang mabêlê, le dintshwana le diphêtlhô tse di huduwang le go fêtlhêla ôna mabêlê fa a dirwa bogobê, mme fa bogôbê bo budule bo tsholelwé mo megopong e e dirilweng ka legong. Ba bêtla dintshwana le meruba e e gamêlang, gapê ba bêtla meropa. Mme ba itse go bêtla dipati tse ba neng ba tswala mejakô ya matlo a bôna ka tsôna. Dipati di ne di bêtlêlwâ dikgofe tse di itshwarêllang ka tsôna mo lobeteng la ntlo.

Fa go dirwa lebati go senkwa setlhare se sekima sa monyena, se rêngwa dikala go sala kutu e boleele ja yôna bo ka lekanang go tswala mojakô wa ntlo ; mme banna ba e atamele ka dilêpê, yo mongwe ntlha e ngwe, le yo mongwe ntlha e ngwe. Banna bao ga ba reme, mme ba bêtla kutu eo, e ntse e eme e sa rêngwa, mme ba dira jalo e le gore kutu e se ke ya ba ya tsikinyêga fa e ntse e bêtlwa. Mme fa babetli ba ntse ba bêtla, kôta e tla nne e fokotsêga, e be la bofêlô e sala e le phaphathi fêla ; mme bôna babetli ba

tsweletse go bêtla e be la bofêlô kômôta ele e kima-kima e sala e le lebati le le lengwe fêla le le phaphathi. Mme jaanong go atamêla ditswerere di le rethefatsa gore le tle le se ke la ngapa diatla tsa batho fa ba le bula le fa ba le tswala. Fa le fedile le a réngwa le isiwa kwa gae le tsêngwa mo dikgofeng le tswalwa. Fa le bulwa le gôgêlwa kwa letlhakoreng, mme fa le tswalwa le gôna le gôgêlwa le busediwa kwa le neng le le teng fa le tswetswe e leng go thiba mojakô. Mobadi a utlwê gore ôna mojakô oo, ga o mogolo, o lekane motho fa a tsêna a abula ka mangwôlê.

Yôna ntlo fa e agiwa, go agiwa lebôtana ka mosomane le agiwa ké basadi. Tirô ya banna ké go rêma dikôta tsa ntlo, maotwana, dithupa gongwe ditlhomesô le maballô le kgofati. Maotwana fa a epetswe e le a a lekanang go rwala bokete ja dirulêlô, mme e bile e le a a maphata gore a tle a kgônê go rwala dipalêlô, mme fa a setse a epetswe mo tikologong ya lebôtana, go bêwa ditlhomesô le dipalêlô, jaanong go tle digai, mme tsôna digai ké matlhaku a matelele a a ntseng a na le dikala le matlhare mme e seng a a nang le mitlwa ; jaanong matlhaku ao e tla re a sa le matala a alwa fa fatshe a gatisiwa gore a tle a phatlalalê mme a ômê a gatisitswe a tle a ômê a phatlaletse mme a kgônê go dira mathudi a a pila, gapê e tle e re fa bojang ja go rulêla bo tla, bo tle bo utlwanê pila le tsôna.

Mme fa banna ba feditse tirô e yotlhe ya dikôta, ba epe-tse, ba pakile, ba bofile ba tiisitse, jaanong go tla basadi ; ké bôna ba rulêlang ka bojang jo ba bo kumotseng ka medi. Mme fa ntlo e agilwe, e pakilwe e bile e ruletswe gwa be go ise go fele, gwa be go sa ntse go tshwanetse go agiwa ntlo e ngwe mo teng ga e e setseng e agilwe ; mme yôna e agiwa fêla ka mmu o o kôpantsweng le bolôkô e be e tle e kôpanê kwa godimo e ntse e le mmu fêla jaka seolo. Mme yôna ntlo eo ya ka mo teng ké yôna e e tswalwang ka lebati le ke setseng ke buile ka lôna. Ntlo eo ya mmu e agilweng ka mo teng ké thollo fêla ga go fensetêrê epê fa e se ôna moja-

kô o monyenyan e go tsênwang ka ôna go abulwa ka mangwôlê.

Ké ôna matlo a segaetsho, mme ké ôna a nna mokwadi wa bukana e ya rona ke tsaletsweng mo go e ngwe ya ôna matlo a a se-Africa sa Borwa. Ntlo e e agilweng pele ké "Kgotlane" leina la yôna. Gapê bagologolo ba rona ba ne ba itse go itirêla mesamô e mentlê ka legong la morula, le megopô le mafyo ; le tse dingwe le tsôna di ne di dirwa ka ôna morula.

KGAOLÔ YA 2.

BOPHELÔ JA BAGOLOGOLO BA AFRIKA YA BORWA

Bophelô ja bagologolo ba rona, e ne e le jo bo kwa tlase thata, fa bo bapisiwa le ja batho ba methha ya kajeno ya lesedi le ya tswêlêlô-pele. Le bôna ba ne ba ntse ba na le letlhasedinyana le lenyenyan bakeng sa mewa ya bôna.

Le fa ba ne ba le tlase-tlase mo lefising, le fa go ntse njalo, go ne go le teng tlhasenyana ya lesedi mo dipelong tsa bôna e e ba bontshang fa ba dira molemô le fa ba dira bosula ; molaô wa Modimo o ne o kwadilwe mo dipelong tsa bôna. Mme le fa ba ne ba sa itse sepê ka ga Jehova Modimo le ka Jesu Kreste morw'a Modimo Yo o swetseng dibe tsa lefatshe lotlhe, le fa go ntse jalo, ba ne ba dumêla fa go le teng Modimo o mogolo o o sa sitweng ké sepê. Ba ne ba bile ba na le seane ka ga Ôna se se reng, "Nthômpe e itsiwe ké Modimo."

Gapê re ka ithuta tumêlô ya bôna ka yo mongwe wa bôna yo a lebogang thusô le paballô ya Modimo a ipôka a re :

Mmampadi batho ba ntlhoile

Ba ntlhoile kë sa le mo mpeng

Ga mmê ga Maasana a Thekisô ;
Ba re : " A ga ka a šwa a sa le mo mpeng."
A gana, a lala Thipa 'a Makau,
Ga gana—Ôna o o mpopileng
Wa re : " Thipa 'a Matshela
Ga a bonwe ké selo."

.....

Ka nama ka tla ka tswalwa,
Bahumagadi ba êpa mahuitsana
Ba re : A ga ka a bolawa ké ditantabana,
Ké dilô tsa bana ditantabana !
Ga gana Ôna o o mpopileng,
Wa re : " Thipa 'a Matshela
Ga a bonwe ké selô."

Mme jaka ke boletse gore ba ne ba dumêla fa Modimo o le teng o o itseng " nthô-mpe," ba ne ba Ó ikanya fa medimo gongwe badimo ba setse ba paletswe ; ba ne ba ikgomotsa ba re : " Nthô-mpe e itsiwe ké Modimo ; " mme kwa ntlê ga Modimo o o itseng " nthô-mpe " go ne go na le medimo gongwe badimo. Mme yôna medimo eo, e ne e le e mebôtlana e ka se ke ya ba ya kgôna go lêkangwa le Modimo o itseng " nthô-mpe." Gapê yôna medimo eo, e ne e sa buse batho ba botlhe. Morafe le morafe, le motho le motho, ba ne ba na le medimo gongwe badimo ba bôna. Mme medimo gongwe badimo bao, go ne go rêwa bagolo-golo ba bôna ba ba suleng. Baheidênê ba Afrika ya Borwa, ba ne ba sa dumele gore motho fa a swa mono lefatscheng o swêla ruri. Ba ne ba dumêla gore motho o rôbala fêla, a ntse a na le thata ya go tlhôkômêla medirô le mesepèle ya ba lesika la gagwe. Ba ne ba re : " Fa badimo ba itumedisiva ké medirô gongwe mesepèle ya yo mongwe ba ne ba mo rôballa mme motho yoo a tlhôgônôlôfale, a phele monate gobane medimo yabô e mo rôbaletse."

Mme fa medimo ya gagabô motho e sa itumedisive ké medirô gongwe mesepèle ya gagwê, gôna medimo gongwe

badimo ba ka se ke ba mo rôballa, mme ba tla mo êmêla ka dinaô, mme motho yoo wa batho o tla rogakêga a tlhôke letlhôgônôlô, a phele botlhoko mo lefatsheng gobane medimo yabô e sa mo rôballa. E ne e tle e re fa motho gongwe ngwana a sa phele sentlê a tshwenyêga, go ne go tle go bidiwe “ bo-Re-a-itse ” (Dingaka) mme bôna “ bo-Re-a-itse ” bao ba tle, mme ba gase bola ; go rêwa ditaola gongwe

Kgagara tsa metsi a pula
Di kokonwa ke mpša tlhaba
Di ôlélwa matlakaleng,
Marapô a tse di suleng
Ma-laola-di-tsamayang.

Mme fa e rile “ Re-a-itse ” a di latlha, tsa wa ka lewa le le reng,

E re O disa tsa ga Phuu Kgama ’a Ngwaketse
O di sekise maôlô
E tle le badimo ba Go gopodisê,

Fa di ole ka lewa leo, go tla twe : “ Medimo yabô ga ya mo rôballa,” mme go tla dirwa ditlhabêlô tse di supiwang ké ngaka gore bogale ja medimo mo mothong eo bo tlê bo boê ka moragô, a itshwarêlwê, medimo e mo rôballê a phelê pila a tlhôgônôlôfalê.

Mme fa molato e le wa setshaba, bogale ja Modimo bo a bonatshêga. Foo go tla batlêga gore go rapêlwê Modimo o mogolo o o itseng “ ntho-mpe.” Go tloga morafe otlhe, banna, basadi, bana le dikgomo go iwa felong fa go neng go kaiwa go le boitshêpô, kwa Modimo o agileng teng kwa thabaneng ya boitshêpô ya

Seletšana sa ga
Mosime ’a Phokwana.

Mo metlheng ya bogologolo ya Bakwena ba ga Mogôpa, go ne go se na motho opê yo a nang le tshwanêlô ya go ka buélêla setshaba le Modimo fa e se wa kgôrô ya Batlase. Batlase e ne e le lesika la baperisiti mo ga Mogôpa ’a Dira.

E ne e tle e re fa go atametswe Seletšana setšhaba se eme kgakalanyana le thabana gore dinaô tsa batho di se gate mmu wa boitshêpô go o itshepolola ; mme go tlabiwa ditlhâbelô. Mme Batlase, e leng Baperisiti, ba ise ditlhâbelô tsa setšhaba fa pele ga Modimo o o itseng “ nthô-mpe mpê.” Mme mopresiti wa sesadi o rapêlêla setšhaba a re,

Ntšholetseng, ntšholetseng

Ntšholetseng ka difata

Moima ke a lêpêlla,

Ke bônê a nka se tswale—

Nka se tswale sesimanyana ;

Ke tlhomolwa ké Rarê pelo

Monna ga’ game puleng

A gama a ikôtêlêla.

Ntšholetseng ntšholetseng

Ntšholetseng ka difata

Moima ke a lêpêlla,

Ke bônê a nka se tswale—

Nka se tswale sesetsanyana ;

Ke tlhomolwa ké mmê pelo

Mosadi ga’ sile puleng

A sila a itshoteletsa.

Mme ga twe e ne ya re fa ba fulara kwa thapelong eo ya setšhaba, Modimo o no o ba araba ka go ba nesetsa pula, go ba medisetsha dijô tsa batho le tsa diruiwa tsa bôna.

Bagologolo ba rona ba phedile dinyaga tse dintsi mo lefatsheng leno la bôna ka bophelô jo bo makete ; mme ke kwadile ka ga thutô ya bôna le ka ga Tirêlô-Modimo ya bôna. Mme ke gopola gore go ka ba teng babadi ba ba ka nyatsang fa ke rile bagologolo ba ne ba na le thutô ; mme babadi bao ba rona ba ka lebêlêla ya gompijeno thutô, ba e bapisa le ya bogologolo e e kwa tlase-tlase ; ba tshwantsha digale tsa bogologolo, tse di ntseng jaka marumônyana le dilêtswana le melangwana, mme ba di bapisa le tsa kajeno, tse di ntseng jaka dithunya le dikanono le ditanka le difofi

le diképê tsa ntwa tse di dirisiwang mo dintweng tsa gompijeno, mme ba rata go nthiba molomo, ba re : “ Didimila ! ga O bolele sepê ! A lefifi leo la bogologolo a ké lôna le O ka reng ké thutô ? ”

Eh, bagaetsho ! Ka rialo, ka re : “ Ké thutô, e jalo fa e sa le pôtlana.” A nke ke Lo botse potsô ké é : Namane ké eng ? A ga se kgomo ? Lesea ké eng ? A ga se motho ? Mme thutwana a ga se Thutô ? Kana dilô tsa matlhale tsa kajeno di tshwana le dikgoka le dipôtôngwane tsa monna wa senatla tse e rileng fa a sa le mosimanyana ya be e le maotonyana a masesanyane a ngwana, mme kajeno o godile. Ditšhaba tse gompijeno di fofang kwa godimo jaka dinonyana, le tsona di kile tsa be di le tlase-tlase jaka ba Afrika ya Borwa. Mme kajeno ’tšhaba tseo di godile. Mme le bôna ba Afrika ya Borwa ba ka gola, fa ba ka godisiva ka thutô e e godisitseng ba Basweu ba ba setseng ba godile. Modimo ka nosi o re buletse tsela ya gore le rona re tsênê ka mojakô wa nnete wa go itse Modimo wa nnete le Jesu Kresete Mmoloki wa lefatshetlotlhe.

Modimo o budile mojakô jaanong ? Batho ba gaetsho ba Afrika ya Borwa ba ne ba le mo lefifing le letsho-letsho la boheidénê, mme le dipelo tsa bôna di thatafaditswe ké sebopêgô sa bophelô jo ba neng ba bo phela. Mme gwa bônagala gore fa bareri ba lefoko la Modimo ba ka be ba sale ba tla mo sebakeng seo fa ba Afrika ya Borwa ba sa ntse ba le mo thateng le mo pusong ya bôna, ke a dumêla batlhanka bao ba Modimo ba ka be ba bolailwe tho ! tho ! ! tho ! ! ! Mme Modimo ka o itsetse tsotlhe pele, Wa dira gore tsela e Ó ka tsênyang Evangedi ka yôna mo Afrika ya Borwa e be go amoga batho thata le pusô ya bôna mme ba kokobediwê tlase-tlase kê gôna ba ka inêêlang go amogêla lefoko la Modimo le go tlhabologa.

Ga tshwanêla gore thitê e e pôpôta ya Afrika ya Borwa e Iemiwê pele ka mogoma o mogolo wa tshipi, o kgakamololê metlhô le ’thwana tse di raraaneng mo dipelong tsa batho

ba lefifi ba Afrika ya Borwa. Ka nnete Modimo wa ikgê-thêla banna ba go thapisa thitê ya Afrika ya Borwa. Ga êma monna wa senatla a bidiwa Tshaka, morwa Senzanga-khôna, Kgosi e kgolo ya Mazulu. Mme batlhabani ba gagwê ba apesa 'fatshe leno lotlhe ba bolaya, ba fisa, ba gapa, ba senya. Ènê kgosi e kgolo ya Mazulu, ènê Tshaka, o ne a ipitsa "Zulu," ké go re Legodimo ; mme batho ba gagwê ba bidiwa Mazulu, ké go re ba Legodimo. Motse wa gagwê o mogolo o bidiwa "Umgungundhlovu," ké go re yo kana-ka-tlou. Ó rutile batho ba gagwê tumedisô e a reng o e neilwe ké "Nkulunkulu," ké go re Modimo. Tumedisô eo ya re : " Bayede ; "—ké go re yo a leng pakeng tsa Modimo le batho. Batlhabani ba gagwê fa ba mo dumedisa ba ne ba re,

" Bayede Baba nKosi yamakhosi !
Wena ngonyama ; Undlovu kayiphendulwa.
Bayede Baba, nKosi yeZulu
Wena owakhula silifele ;
Wena omnyama, owavela
Wasiphatha ngomusa
Wen' ongange ndlovu
Wen' odl' amadoda,
Wen' onzipho zinje nge zengonyama
Wen' ongange Zulu eliphezulu,
Wena Zulu siphathe ngomusa ;
Bayede nKosi, Bayede Baba,
Bayede Zulu."

Basadi bôna fa ba dumedisa ba ne ba re,

" Bayede Mtwan' omhle, Mhlekazi !
¹Uteku lwaSafazi ba kwa Nongasî
Betekula 6ehlezi emlovini."

¹ Lewatle : Fa ga e bolele la metsi, mme e bolêla la thabô le leratô la go bolêla ka Tshaka fa ba le nosi.

Ké go re : Thôbêla ! ngwana yo motlê, Motlêgadi,
Lewatlê la basadi ba Nongabi,
Ba ntse ba le budubutsa, ba le boiketlong !

Ditshaba tsa gasagasiwa ké lerumô le le bolayang la gagwê, a kokobetsa magosi. Letshoo la gagwê la imêla malau le malawana, ga nkga loso fêla gothe Afrika ya Borwa. Moragô yo mongwe wa balaodi ba dintwa tsa gagwê yo a bidiwang Umzilikazi, morw'a Mashobane, a tenêga mo pusong e e thata ya ga Tshaka, a amola palô e ntsi ya balaodi le batlhabani le basadi le dikgomo tse o neng a di gapile, mme a itirêla pusô ya gagwê ; a tshaba a leba ntlheng ya Transvaal le Kgalagadi (Bechuanaland). Mme tsela yotlhe ya gagwê ya nna go bolaya, go fisâ, go senya, go gapa, mme lerumô la gagwê le la Morêna wa gagwê, Tshaka, la fedisa thata ya magosi a lefatshe la Afrika ya Borwa, gobane ba ne ba bolaya banna le basadi mme ba gapa bana le dikgomo.

Mme moragô, Moselekatsi a falalêla lefatsheng la Mašôna le Makalaka (Rhodesia), mme lefatshe la sala mo bo-koeng le mo khumanegong, mme le fa go ntse jalo lefatshe la rona la be le ise le tshwanele go ka jalwa peo ya lefoko la Modimo. Tshaka o ntshitse ditlhare mme go batlêga mogoma, dipholo le molemi.

KG AOLÔ YA 3.

MOLEMI WA THITÊ GO E DIRA TSHIMO.

Le fa Tshaka le Moselekatsi wa gagwê ba epile ditlhare mo lehuting, ga batlêga molemi. Modimo wa romêla molemi a tswa kwa moseja ga mawatlê kwa le yôna peo e tla tswang teng.

A fitilha a palame phôlôfôlô e khubidu a le sethunya a le mmala mosweu a tlhantshitse ditedu, ya re fa ba-ga-Zulu ba mmôna ba re : " Umlungu," empa rona Basotho le Batswana ra re ké Lekgowa ; Lekgowa ké go re motho yo montlê gobane o bopegile ngwana wa " Nooi." Ba tséna Masweu, ma-nna-ditulô ba famotse difatlhêgô, ba gatakêla seritshane fa fatshe, ba dira batho ba batsho batlhanka ba bôna. Mme e re malatsi a mangwe ba makatse batho. Ba tlogele ditirô ba kgobokane le basadi ba petleke maphêphê a masweu ba atlhamise maganô ba re : " Moo-moo-moo ! " Mme ba Batsho ba botsa Phusumane ba re : " Ba a be ba etsa'ng fa ba riana ? " Karabô ya re, " Ba bina santaga." A Santaga ké eng ? Karabô ya re : " Santaga ké letsatsi la Modimo wa bôna ; le a ilêlwâ ga go dirwe ka lôna." Fa ba phatlalala ba ba raya ba re, " Difôlôkô le ka ikêla gae tsatsi leno ké ' Sondag.' "

Batho ba rona ba simolola go tlhabêlwâ ké letlhasedi la ntlha la lesedi la Modimo, ba utlwa fa go le teng yo mongwe yo a bileng a le mogolo go bo-baase le bo-noi. E rile fa Santaga se feta go tlhaba la ditirô, ao ! ba êma ka dinaô. Bosêtlha bo tshwana le tau ja êma, Tshweu tsa Mmankoro ba kuwa ! ba ba ba kuwa ! ! ao ! tsa o tlamatsheme go dirwa ka thata e kgolo. Ba le teng dikgalefi tsa mabasa, bo

Sathane 'a Mabasa

Sathane terapa ba Mositwana

O ba kôpanyê ka Bakwena Sathane

Difôlôkô di kgônwa ké go terapy.

Ke itheetseng ka re : " ke Sathane,"

Nkabe ke rile " ke Ramoterapi

Ra-matlhwâ a terapa bo-Makatise."

Ba le teng dinatla bo,

Mothubi 'a difala, Mosenyi

Wa kgôtlwane tsa bo-Matsetse

O thubetse Mmâkapesi tse-gana ;
Mogwê o rile a ile go ralala
A tswe a ile go nyala Kapei le Golengwane
A ya a kgathwa kék ntwa a tlhabana
A tshuba mollô, a ya le selôkô a Mhanola nkwê.
Mmasepapa a Matladi
Motho wa Matladi a bobêla phugô.

Ba le teng bo :

Motho e ka re ba Go tima mannô
O tingwa kék bo-Nkgewane polêkê
O se ikutle wa nna kwa Legonyane
Wa ya go nna kwa Loratlatle leng
Wa tla wa bôna O tshola dikafuru
Bo-Mmanethwa a Batlase.

Ba le teng mabasa bo,

Tladi itaya kwa Matabalakeng
Motseng ga Ramorala 'a Modise.

Ba le teng magole bo,

Mannyolo a noka 'a Naketse
Molapô o se na kgata tsa batho
Mannyolo ga ise a o tsene.

Ba le teng Marêna bo,

Mmamelodi 'a Mašošwe
Tse di maši wa di itse
Ó tlhôla a di tetemisa dithele.
Ga go tlhole go le tsela e ya Phokeng
Tsela e thibilwe kék mokopa
Mokopa o o kwa Thotwane ;
A O tladi morw'a Sepere ?
Ge O bokolotsa lobôtla ?

Bagale bao ba masweu ba fêla ba kokobetsa batho-batsho, fa go bileng ga se ke ga bônwa monna opê yo a se nang ba ba ikantseng lebelô la go tshaba ka dinaô ba inaya naga, bo,

Mmaefodi yo o se na baase

Yo o tlhole o a rôna le dikarala.

Mme batho ba dirisiwa ka thata ba itêwa botlhoko ; le tsôna dikgosi di itêwa mo ponong ya batho ba tsôna, fa e bileng ya re 'tsatsi lengwe, kgosi e itêwa mo motseng wa yôna, basadi ba palêlwa kê go itshôka, fa ba bôna kgosi e laditswe fa fatshe e ntse e itêwa. Ba tsaya metshe ba ke-keta baase ba golola kgosi. Titêô eo ya dikgosi kê yôna e e bileng ya sutlhisa tse dingwe tsa tsôna tsa tshabela ga Mošwêšwê.

Thata le boipusô ja baagi ba Afrika ya Borwa di fedisitswe jalo ké seatla sa Modimo, bothitê ja boheidênê jo bo neng bo tla kgoreletsa thutô ya lefoko la Modimo, thitê eo e lemiwê, e fetolwê tshimo. Mme batho ba kokobeditswe gore ba tle ba amogêlê Lefoko la Bophelô le ba neng ba setse ba le gaufe le go le bolêlêlwa ké bareri.

KGAOLÔ YA 4.

BARERI BA LEFOKO BA TLILE JANG ?

Modimo o o ratileng gore baheidênê ba lefatshe leno ba rêmâlwê Evangedi, Wa itirêla tsela ka mokgwa o o gakgamsang. Moselekatsi, sera sa ditshaba, ênê yo o bolaileng Bakwena le kgosi ya bôna More gongwe

Motsilê² wa Mangana

Motsila wa banna ba Mogôpa

Ga o mele byang Motsila wa batho

Ó bile wa tla wa mela lekwarapa ;

Ké motlhala wa banna ba Mogôpa,

Kwena e ntsho ya ba Modiana

Ga se ya mo Odi, ya mo Leqapane,

* Motsile ke gore motlhala.

Ya re fa e tlolêla Maimane
E tswe e eme ka maroo khwiting !
Kwena e tsene le kgomo bodibeng botsho
Beng kgomo ba rile ka ôka-ôka
Ba putla maduba le ka magokare
Ba itlhoma ba bonégêla bodiba
Bo kgomo e tseneng ka bô,¹
Ba nama ba tsaya dithêbê ba tloga
Ba ya go bôna tse dintsi di kae.
Monna wa Mmatšutselele-tšutse
Yo o rile tshela Odi a lotana,
Ga sutlha kgwana, ga sutlha thamagana
E tswe e le kgomo tsa bo-Raselekane 'a Bapô.
Ntaa di tle le methapô di bonwe
Di bonwe ké bana 'kgomo tsa marumô,
Di tswa kgabong tsa marumô di tuka,
Di bonwe ké Morwesi le Metolong.
Kwena e lomantse maroo le kgabô
Kgabô e le Rara 'go Selebele
Kwena e le Rara 'go Kebawetse.
Gopa Batlase ka legopô Motsile
E re ba fitlha O ba bêê Legaa
O ba bêê Leselese la Thune,
E re go fitlha motlhape wa dikgama
Ba nnane ba o re : taa Motsile,
E re maumô a tsôna ba a Go nêê
O a abêlê Mmusi wa Maabêla.
Ke tswa go dika le Bakgatla thoteng
Ka kwa Ngobyi ka kwa Madiba a tshelô
Kwa nonyana tsa teng di bitsanang ;
Patakase o bitsa Ralopereng
Ó rile hee ! hee !! Ralopereng !
More o agetse borôkô mosakô
Ó motana wa loperere,

¹ Bo-bôna bodiba.

A re, “ Lona bo-Rangwane tlang Lo bo rôbalê,
Bo-rangwane, bo-Mooketsi Lethibê,
Bo-Rampyana, bo-morw'a Mohulatshi,
E re yo o lôra pula a lôrê
Yo o lôra lehuma a le itôrêlê
E re kwebu e tswalwe ké kgomo ya monyane,
E se tlhole e pôtwa mmala e feta
Go twe : “ A kwebu ê, e ka be e le ya kgosi ? ”

Go twe : “ A kwebu e e ka be e le ya kgosi ? ”—le morwa wa gagwê Segwati. Ènê (Moselekatsi) ke lesô la merafe e mentsi ya Bakwena.

Modimo wa roma bareri ba Lefoko la Bophelô ba tswa kwa gó ênê, le fa a itse jalo ka nosi.

Moreri wa pele wa Evangedi mo ga Mogôpa : Moruti Robert Moffat wa London Mission ya be e le tsala e kgolo ya Moselekatsi, a be a ne a mo etetse, mme fa a boyâ a feta fa motseng wa kgosi Mmamogale o o bidiwang Motlhabi-rwane gongwe Matlhare. Mme a rêra lefoko la Modimo le e neng e le thérô ya ntlha-ntlha e e rérêlwang Bakwena ba ga Mogôpa, mme e tswa ga Moselekatsi, e kete ké bo-phelô jo bo tswang mo phupung. “ Mang yo o itsileng boitlhômô jwa Morêna gongwe Mogakolodi wa gagwê e ne e le mang ? ”

Moragô ga thérô eo ya ga Mošwete (Moruti R. Moffat), ga itshwanêla fêla e kete lerothodi leo la thérô ya gagwê le tla fêla le ômélêla mo mmung. Le fa go ntse jalo Modimo ôna wa itse fa ôna o tla okeletsâ lerothodi leo ka marothodi a mangwe a mantsi-ntsi a a tla beng a fetoga pula ya ledutla e leru la yôna le lôna le tswang ga Moselekatsi a Matshobane. Mme pula eo ya ledutla e tla kolobisa bolemê jo bo ntshitweng dithlare ké Lezulu, mme ja lemiwa ké Lekgowa ; tshimo eo e tla kôlôba e be e medisê dipeo tse di tla jalwang go yôna. E sita le yôna tlhakanyana ele ya go sunngwa ké Moffat ga Mogôpa, le yôna e tla mela e gola e

be e kotulwa, gobane “ga o kgatlhwe ké leso la moikepi, mme o rata gore moikepi a boêlê go Ènê a phelê.”

Moreri wa bobedi wa Evangedi mo go Mogôpa : Lo setse Lo utlwile gore kwa ga Mogôpa e ne e se mang le mang yo o ka êmang dipakeng tsa Modimo le batho go ba buêlêla le fa e le go ba ruanya le Modimo fa e se wa lesika la boperisiti wa kgôrô ya Batlase mo metlheng ya bogologolo. Mme se se gakgamatsang ké fa Modimo o sa le o dumalana le Bakwena le fa bôna ba ne ba dirêla mo lefifing. Modimo le ôna wa ikgêthêla Motlase gore e be ênê Moevangedi gongwe Mmueledei wa ntlha wa Bakwena ba ga Mogôpa le ba Phokeng.

Mosimane wa Batlase yo o bidiwang Mogatle a thopiwa, le basimane ba bangwe ba thopiwa ké batlhabani ba ga Moselekatsi fa a falatsa ditshaba. A tsengwa mephatong ya gagwê. Mme ka mokgwa o o ikgethetsweng ké Modimo a phonyoga mo Matebeleng a fitlha Koloni, mme teng a utlwa thêrô ya Lefoko la Modimo a le dumêla a ba a kolobediwa mo kerekeng ya Wêsêlê ka leina la Davide. A nate-fêlwa ké thutô a ruta a ba a nna moreri wa Evangedi. Mme ya re fa a ntse a rérêla batho a gopola morafe wa gagabô o o leng mo botshong ja lefifi, mme a batla tsela ya go boêla gagabô. Modimo wa mo thusa a nna a ya a ba a fitlha Tlôkwê (Potchefstroom), ka thusô ya Modimo a ba a fitlha 'tšhabeng sa gagabô sa Bakwena ba ga-Mogôpa.

Fa a fitlhile a ya kwa balaoding ba lefatshe go kopa tumêlêlô ya go ruta batho ba gagabô mafoko a Modimo o o phedileng. Mme le fa ba bangwe ba ne ba sa dumele ba re, “E tla be e le go senya dikafuru fa ba rutwa,” ga gana molaodi wa bôna

Poulô 'a Mabasa

Tšhweu Mmamelodi a Mašošwe.
a re : “Lesang ‘bobojane’ e ithutêlê ‘dibobojane’ tsa ga bo-yôna.”

Mme Mogatle yo e leng Davide Modibane a simolola modirô. Ao ! La gôrôga lejaga la tla le fetogile e sa tlhole e le la ga Moselekatsi, mme e le la Jesu Kresete, le sa tlhole le bolaya batho ka lerumô, mme le phedisa batho ka Evangedi. A gôrôga Motlase, e sa tlhole e le moperisiti wa Seletšana mme e le wa Jehova Modimo le wa Jesu Kresete.

Ké ênê Moruti wa ntlha yo o rutileng Bakwena ba ga Mogôpa. Dithêrô tsa gagwê tsa okeletsa thêrô e e neng e rîrwa ké Moruti Moffat, mme tsa fetoga marothodi a a diregileng pula ya ledutla e e ntseng e na ka medupe le mo malatsing ano a kajeno a bokajeno. Leru leo la dithêrô le dumile le tswa ga Moselekatsi—“ Ga tswa dijô sejing.” (Basiamisi 14, 14).

Tirô ya ga Davide Modibane : E rile Davide a tsêna mo gagabô, a fitlhêla lefifi le ntse le khurumeditse, mme Bakwena ba arogane ka maagô. Kgosi le ba bangwe ba agile Motlhabirwane, gôna fa Moruti Moffat a ba reretseng thêrô ya pele ba le teng. Ba bangwe ba le kwa Mokung le kwa Ramogomana. Ba bangwe ba tshedile noka ya Odi ba le kwa Mantabole yo a bidiwang Bethanie kajeno.

Mme a simolola go ruta thutô ya Lefoko la Modimo, a dira ka tlhoafalô e kgolo, a ithokisa boikhutsô a ruta mo mafelong a a aroganeng. Kwa Matlhare yo e leng Motlhabirwane, kwa Mantabole, kwa Mokung le kwa Ramogomana, le kwa Phokeng, jalo jalo. Modimo o o dirang le ka tse di bokoa, Wa tlhôgônôlôfatsa tirô ya motlhanka yoo wa Ôna, ba bangwe ba dumêla thutô ya gagwê mo mafelong kwa o rutang teng ; a nna a ba ruta ka tlhoafalô, mme le fa a ne a se na dikwalô tsa puô ya rona, a ruta barutwa ba gagwê go bala ka sepêlêtê sa Sekgowa, ba bangwe ba ba ba itse go buisa ka sôna Sekgowa.

Ya re fa ba setse ba rutilwe thutô ya Bokresete a se ke a ba kolobetsa ka e ne e se moruti yo o kolobetsang mme e le

Moevangedi fêla. A se ke a ba fitlhêla a ba bolêlêla fa a sa nêwa kolobetsô, gapê baruti ba Kérékê ya Wêsêlê go se bonôlô go ba bôna ka ntlha ya bokgakala.

Ka tsatsi le lengwe ga utlwala fa go le baruti ba bangwe ba Kérékê ya Luthêrê ba ba batlang fa ba ka rutang teng. Mme Davide fa a ba utlwêla a roma bangwe ba barutwa ba gagwê go ba bitsa. Mme ba tla go ênê kwa Mantabole kwa o neng a setse a agile kérékényana teng. Mme le fa e ne e le Mo-Wêsêlê a dumalana le bôna, a inêêla le barutwa le tirô yotlhe mo go bôna. A sala le Moruti W. Behrens mo Mantabole ; mme moragô Mantabole a bidiwa Bethanie. Davide Modibane a swêla mo Bethanie, a ba a fitlhwa gôna mo Bethanie.

Baruti ba pele ba kwena ba ga Mogôpa : Moruti wa Behrens le Moruti H. L. Kaiser ba amogêla tirô mo morafeng wa Bakwena ba ga Mogôpa. Moruti Behrens a aga Mantabole a ruta mo Kgaolong ya lefatshe la Tlhabantse (Rustenburg Dist.) mme Kaiser a aga mo Matlhare a ruta mo Kgaolong ya lefatshe la Tshwane 'a Mmamelodi (Pretoria Dist.).

Banna ba babedi bao ba Modimo ba godisa tirô ya pusô ya Modimo mo morafeng wa Bakwena ba dira diphuthêgô tse dikgolo tsa Kérékê ya Luthêrê ya Mišone wa Hermansburg. A go bakwê Modimo o o re ntshitseng ka leratô le legolo la ôna mo lefifing go re bontsha lesedi le le isang polokong.

Mme le fa re le Bakresetse ba Kérékê ya Luthêrê, re rapêla Modimo go re thusa go sala le go swêla mo Kerekeng e ya rona, le fa go ntse jalo, re tshwanetse go gopola ka tebogô kérékê ya London Mission e Moruti wa yôna a suntseng tlhaka ya ntlha ya Lefoko la Modimo mo morafeng wa rona. Gapê re gopolê ka tebogô kereke ya Wêsêlê e moevangedi wa yôna o beileng mothêô wa go aga pusô ya Modimo mo morafeng wa rona.

“ Mme ênê yo o jalang ga se sepê,
Le ênê yo o nosetsang ga se sepê
Mme ké Modimo o o medisang.”

1 Bakor. iii. 7.

Thutô kwa Matlhare : Matlhare ké leina la thaba mme Motlhabirwane ké leina la molapô mo thabeng. Motse o mogolo wa Bakwena ba ga Mogôpa o ne o agilwe teng o bidiwa Matlhare gongwe Motlhabirwane. Ké ôna motse o moruti wa kérékê ya London Mission, ênê Moruti R. Moffat gongwe Mošwete, o kileng a rêra thêrô ya ntlha mo go ôna. Kê motse wa Kgosi Tedie yo o tumileng ka leina la

Mmamogale a Matsobane tshii.
Tshii ke letse le tlala Manganeng
Kwa morakeng wa etsho wa Masweu ;
Keketi dikôpanô
Pharagobe tsa dinokana Kgabotsi.
A le ge Le re 'Kgomô tsa More di lebelô
Tsa More di sia badisa,
A di ka tshaba di ka tlogêla Keketi ?
A e ke se re ge di fitlha fa sekatong
Fa 'kgomo tsa More di katileng
Fa mora 'a tshimo ya Raphora
Fa mora 'a tshimo ya Ramoakanyana,
Ya re Keketi ka betsa dinaô
Ka tlhotlholokanya maoto Kgadibete ?
A Keketi go ka twe di mo siile !
A e ka se re go utlwa Matshose a nyatsa,
Ya re morwa Rakefeng a bolêla :
“ Re mo itse a le byaba Keketi,
Di mo latlha a le go kae ? ”

Ke setse ke boletse gore metse ya Seterekê sa Mma-mollodi ya Bakwena ya rutwa ké Moruti H. L. Kaiser, mme a e ruta a le gôna motseng oo wa Matlhare a tlhomile

têntê mo lebaleng je le fa pele ga motse ; mme thusô e kgolo ya gagwê ya ba barutwa ba ga Davide ba ba ineetseng ; le ba bangwe ba ba neng ba ise ba ineele Davide ba tla ba rutwa ka Modimo o o phedileng. Ba tswa kwa Mokung le Ramogomana le Mmamonne le mo gae mo Mathhare. Mme Moruti Kaiser a ba tsenya sekolo sa kolobetsô góna fa lebaleng. E rile fa ba ntse ba oketsêga a tlosa têntê ya gagwê fa lebaleng la motse a atamêla a aga gaufe le thaba ya Mathhare, mme ba ba dumetseng ba tswa mo metseng ya bôna ba atamêla Moruti, ba aga motse wa Badumedi gongwe Phuthêgô, mme ba ikagêla ntlo ya kérêkê e e leng kérêkê ya ntlha ya Hermansburg mo kgaolong ya Mmamollodi. Ké yôna Kérêkê e Ntate le Mmê le rona bana ba bôna ba batlhano ba ntlha re kolobeditsweng mo go yôna le ba botlhe ba phuthêgô ya Matlhare.

Thutô fa e tsêna mo bathong, ya dumêlwa ké ba bangwe fêla, bontsi ja e gana. Ba ba e ganang ba bitsa badumedi ka leina la Bakapi ; ya re ka pusô ne e setse e le ya Makgowa baheidênê ba palêlwa ké go ka dira sepé go bolaya Bakapi. Mme ba bangwe ba leka go ka ba bolaya ka bo-saatsiweng, ka boloi. Yo mongwe wa barutwa ba ga Davide, rra le mma, ba leka go bolaya ngwana wa bôna, ba mo nosa mfolô go mmolaya gobane ba re, “ go kaone go rona go fitlha mo phupung serépa sa ngwana wa rona, bogolo go go mmôna ka galê fa pele ga rona ngwana yo o senyegileng. Go re thusang ! a a swê.” Mme ngwana yo a nwa mfolô oo wa batsadi ba gagwê, mme a se ke a swa, a tshela a ba a tsofala. Mmagwê mo botsofeng a ya go tsholwa ké ênê ngwana yoo wa gagwê. Moragô le ênê mmagwê mo botsofeng a tlhabologa a kolobediwa, a ba a ipobola fa pele ga morwa yoo wa gagwê se ênê le monna wa gagwê ba se dirileng mo lefising la boheidênê.

Khudugô go tswa Mutlhare : Moragô badumedi ba sitwa ké go phela le Baase wa naga. Jaanong ba batla tsela ya go tswa mo go ênê, mme ba utlwêla ka ga naga

Kamelfontein e e kwa Moduane fa e rekisiwa, mme ba utlwana le mong wa yôna Morêna B. Engelbrecht go e rêka. Moruti H. L. Kaiser a dumalana le phuthêgô gore naga e rêkwê ké Genosekapa le phuthêgô mmôgô. Genosekapa e ntshê lekgolo le masomê a matlhano a dipôndô (L150), phuthegô le yôna e ntshê lekgolo le masomê a matlhano a dipôndô (L150) go fetsa thêkô ya naga e e leng makgolo a mararo a dipôndô (L300). Mme phuthêgô ya be e le banna ba le masomê a mabedi le metsô e supang (27) Mme ya re ka go bo tshélêté e ne e tlhôkwa mo sebakeng seo, banna ba bula maraka ba ntsha dikgomo, monna le monna kgomo.

E rile fa dikgomo tseo di fitlha mo go mong wa naga, a di galala a re ga di lekanc lekgolo le masomê a matlhano a dipôndô. A re : " E ka kgôna di okediwê gapê ka tse nnê (4)." Ké fa Samuele Ntwane le Josefa Nkwe le Lot Molopyane le Saule Kgasi, banna ba banê bao ba boêla gapê marakeng ba ntsha gapê, mongwe le mongwe wa ba banê bao kgomo, ya ba kgomo tse nnê go tlatsa se se neng se galalwa ké mong wa naga. Mme mong wa naga, Morêna B. Engelbrecht, a di amogêla a tsamaya. Ka ga letlhakore la Genosekapa tsa itsiwe ké Moruti.

Phuthêgô ya huduga kwa Mathlare ya ya kwa Moduane. Ya re fa re fitlha mo mmotong, mme ge matlhô a rona a bôna legae le leša le re yang go lôna, banna ba emisa koloi ba tlhaba sefela. Ra fologêla ka pakô, re ôpêla ka dipêlo tse di thabileng re re :



1. He-la ba - e - ti ba tshego-fa - di-tswe Ba ba leng



Mono mo dipogiso - ng Yana ba fentse 'me



Yana ba dutse Le Jesu mo se-ding mo kgalalelong.

2. Ga go na poifô le dikgwereanô
Le ditapisô kwa legodimong
Tsholofologô le yôn' e fetile
E seng go tlhôla go bônwa ké bôna.

3. Thêbê tsa bôna ba di sikorotse
Ga go poifô kwa Jesu Ó gônê,
Tšhaka tsa bôna ba di huporotse
Ga go tlhabanô kwa legodimong.

Phuthêgô ya Matlhare e tsene jalo mo lefatsheng la Moduane, ga ba ga gopotsa go tsêna ga Baiseraele go tla le go tsêna mo lefatsheng la Kanana.

E rile fa phuthêgô e tsêna mo lefatsheng le ba le rekileng, ba fitlhêla go agile Bakgatla ba ga Mmamarama le ba ga Mmakau ba ba neng ba ntse ba agetse mong wa naga yo o tsamaileng. Moruti a bua le phuthêgô gore ba se ke ba ba amoga masimo, ba ka huduga ba tsamaya e tswe re batla gore ba utlwê Lefoko la Modimo ba tlhabologê gore phuthêgô e golê. Mme ya re ka badumedi ba sebaka seo e ne e le batho ba kutlô, ba dumêla se se bolêlwang ké Moruti.

Ba itemêla a bôna masimo ba lesa a Bakgatla, ba aga le bôna mo nageng eo ya bôna.

Motse o moša o o agiwang ké phuthêgô e e tswang kwa Matlhare, wa nêwa leina la “Hebron,” mme phuthêgô ya Matlhare ya apola leina la Matlhare ya apara leina la “Phuthêgô ya Hebron.” Bakgatla ba tlhabologa, mme phuthêgô ya gola. E tswe le bôna Bakwena ba ba neng bá setse, ba ba neng ba le mo metseng, ba bantsi ba bôna ba nna ba tlhabologa ba tla phuthegong kwa Hebron. Mme ba bangwe ba hudugêla kwa Dithhareng ba aga Mmatope, Madinyane, Motshwane, Rasai, Letlhakola, Legonyane, jalo jalo. Ba e rileng moragô ga ba romêlwa Moruti Peters a aga mo Setlhale a rêka le batho naga ya Setlhale a dira phuthêgô a e bitsa Jericho. Ké yôna phuthêgô ya Jericho e kajeno e leng tisong ya Moruti Sibidise (Siebelo).

Kgabalatsane : Bakwena ba ba neng ba le kwa Matlhare Mmamonne le Ntšopilong, ba e rileng fa ba Phuthêgô ba golediwa kê tshokô ya mong wa lefatshe, bôna ba sala ba re ba tshwareletse, le bôna tshokô ya ba thuba lepêtlékê, ba simolola go batla kwa ba ka bônang boikhutsô. Mme Moruti kwa Hebron a utlwêla naga e e bapadiwang e e tshwaraganeng le Kamelfontein ntlheng ya Bophirimatsatsi, e e bidiwang Cyferfontein. A itsise phuthêgô a ba a e gakolola go laletsa Bakwena ba ba setseng kwa metseng gore ba kôpanêlê le bôna thêkô ya naga eo. Mme ba ba kwa metseng bogolo Ntšopileng, ba re fa ba utlwa ba se ke ba tlhole ba re re be re bolélêlwê gapê, gobane tirô ya “*more kom*” e ne e ba tsene disifeng ; mme ba dumêla ka pele taletsô eo. Ba ntsha dikgomu tsa kôpanngwa le tsa ba Hebron, naga ya rêkwa Bakwena ba bôna botshabêlô.

Ya re fa go itokisediwa khudugô, banna ba bôna gore go ka ya banna pele ba ya go rêma dithupa tse e tla reng fa ba tla ka thoto ba kgôna go agêla bana metlôtlwana. Mme ka nnete ba rwala dikobyana le dilêpê ba ya go rêma kwa nageng e e rekilweng e e bidiwang Mošabetsana. Ya re

ka magetla a motho a sa rwale gagolo, mefagônyana ya ba fêlêla ba ise ba fetse tirô. Jaanong ba boêla gapê kwa gae go tsaya mefagô e mengwe, mme ba tsene kwa gae ba tshwerwe ké tlala ba lapile. Lesogwana le lengwe la Photing le e leng mongwe wa baremi bao, yo o bidiwang Modise, e re fa go itokisetswa go boêla kwa tirong ya go rêma, a nne a re : “ Re a be re ya kwa felong ga tlala, re yo tlhôla re gabaletse, kana” : “ re a be re ya kgabalatsane.” Polêlô eo ya ga Modise ya tuma mo bareming ba botlhe fa ba ya ba nne ba re, “ Re ya kgabalatsane.” Modise a bidiwa Rankgabalatsane go ya losong a ntse a bidiwa jalo. Mme motse o o agiwang oo wa bidiwa ka leina la Kgabalatsane go tla tsatsing leno. Serêtô sa ôna ké :

Kgabalatsane 'a moriti

Naga ya dikgomô le batho.

Naga ke llêla Lenatô

Ke lletse Kgabalatsane 'a Moriti.

Naga e se nang sekgori

Sekgori sa yôna se sengwe,

Sekgori sa yôna Lenyôra

Lenyôra le bônwa ge tsatsi le eme ;

Moduane 'a bo-Lekgere hulara

Moduane hulara kwa Rapopele,

Dipêtlwana di salê kwa Mapenane ;

Bana ba Gago kwa gae ba lela

Ba lela—ba pelo e botlhoko ;

Ratshukudu a Ratibane Mophiring

Segale 'a Ramotse Morolong

Ntshontsho a Motlhoiwe Mophoting

Ba lela—ba pelo e botlhoko

Ba re : “ Moduane Mmaetsho re amusê

Ra lala le lenyôra O le teng re re'ng ?

Kgabalatsane a Moriti gomola,

Mosabetsana gomola ke Go belege

Ke Go belege ka thari ya namane.

Thutô e tsene jang mo Kgabalatsane : Baagi ba Kgabalatsane e ne e le baheidêne fêla e ne e a re fa mongwe wa bôna a rata go inêela Modimo ka tlhabologô, a hudgele kwa Hebron go atamêla moruti ; mme batsadi ba lemoga gore mokgwa o wa gore fa ngwana a tlhabologa a tlogele bagolo ba gagwê ba ba tsofetseng, a ye go aga kwa Hebron, ga o molemô. Mme ba buana ba roma dikgosana tsa bôna tsa dikgôrô e bong :

- (1) Ratshukudu Masike, Kgosana ya Baphiring,
- (2) Segale Komane, Kgosana ya Barolong, le
- (3) Ntshontsho Nyakale, Kgosana ya Baphoting.

Dikgosana tseo tsa kopa Moruti go ba romêla yo a ka ba rutang a agile le bôna. Mme moruti le phuthêgô ya Hebron ba dumêla kopô ya ba Kgabalatsane, ba romêla Miga Kgasi yo a neng a ntse a tshwere sekolo sa bana kwa Hebron, go ya Kgabalatsane go ya go ruta batho ba Kgabalatsane thutô ya Lefoko la Modimo, le go tshwara sekolo sa bana. Mme a nêwa tirô eo ya thutô ka kgwedi ya Motlwê (May) fa e le masomê a mararo ka ngwaga wa sekete le makgolo a rôbang menô e mebedi le masomê a a férang monô o le mongwe le metsô e menê. (30th May, 1894), monei wa tirêlô e le moruti H. L. Kaiser.

Miga Kgasi a tlogêla legae la gagwê a latêla thomô e o e romilweng, a ba ruta mo sekolong sa Kolobetsô le sekolo sa bana le sekolo sa selallô mo go ba ba kolobeditsweng, ba rutwa thutô ya selallô moragô ga kolobetsô. Gapê Kérêkê ka disondaga le meletlô ya tswêlêla.

Mme Modimo wa tlhôgônôlôfatsa tirô eo ya ôna mo Kgabalatsane. Kajenô, Bakresete ba ba kolobeditsweng le go amogêla selallô, ba balwa ka makgolo. Bana ba sekolo ba feta makgolo a mararo. Barutisi mo sekolong ba supa (7) Bana ba rutwa go feta Setlhôpha sa Botshelêla (Std. VI). Moromiwa yoo le fa kajeno a tsofetse a setse a sitwa ké go tsamaisa sekolo sa bana ka botsofe, le fa go ntse

jalo o ntse a le mo tirelong ya Lefoko la Modimo le kajeno
1938 :

“ O se ntatlhe mo motlheng wa botsofe
O se ntlogele ge thata ya me
E nyélala.” Pes. 71, 9.

Matlhare : (Ga bobedi) : E rile motse wa Kgabalatsane fa o thusitswe ka go romélwa moreri wa Lefoko la Modimo, ga tshwanéla gore le yôna metse ya Matlhare le Sehibidung le yôna e romélwê bareri ba ba tla ba rérêlang ba agile mo go bôna. Mme phuthêgô le Moruti Kaiser ba itshenkêla Wilhelm Monaise, ba mo romêla kwa Matlhare, mme a ba ruta Lefoko la Modimo, ba le utlwa, bontsi ja bôna ba tlhabologa, a ba a dira sekolo sa bana, mme motse wa Matlhare wa nna sethô se sengwe sa phuthêgô ya Hebron.

E rile moragô Wilhelm a fapana le tsamaisô ya Kêrêkê, a tswa mo phuthegong ya Hermansburg a inêela mo kerekeng ya L. B. Church ; mme kajeno ké moruti mo Kerekeng eo ya L. B. Church. E rile fa W. Monaise a se na go tswa phuthêgô ya Hebron ya itshenkêla Adam Modipane, ya mo romêla kwa Matlhare, mme a disa phuthêgô go fitlhêla e faladiwa ké ntwa ya Maburu le Manyesimane ba ya kwa dileteng. Ya re fa phuthêgô ya Matlhare e faladitswe, modisa wa yôna Adam Modipane a nêwa tirô ya go ruta bana kwa Hebron mme loso la mo tlosa teng. Yôna phuthêgô ya gagwê, e agile kwa Ramogaodi, mme e kôpane ka tirêlô le ya Sehibidung kwa Rabokala.

Sehibidung : Kgabalatsane le Matlhare fa di se na go nêwa bareri, ga boyga ga itshenkêla Paulo Monaise, a itshenkêla ké Moruti H. L. Kaiser le phuthêgô, mme a romélwa kwa motseng wa Sehibidung go ba rérêla Lefoko la Modimo, mme le ênê a dira ka bonatla, ba bantsi ba tlhabologa. Modimo wa gopola Poulo Monaise ka loso, mme ga romélwa Jethoro Pelle II boemong ja gagwê. Le ênê loso la mo tlosa. Ga romélwa gapê Johannes Phetlhe,

mmé le ênê a ntshiwa ké loso mo tirong. Kajeno phuthê-gô é e hudugetse kwa Rabokala, e kôpane le ya Matlhare e e leng mo Ramogaodi, mme ga go Moevangedi, di disitswe ké bagolo ba phuthêgô.

Rantalane : Mo nageng ya Hebron e ntlheng ya Borwa go ne go agile Bakone ba ga Mmakau ba ba falaletseng mo go yôna. Mme phuthêgô ya Hebron ya gopola le bôna bao fa le bôna ba tshwanêla go bolêllwa Lefoko la Modimo mme motse wa bôna o no o bidiwa Rantailane. Ya re go ise go bonwe yo a ka romêlwang teng ga nna ga ya bagolo ba phuthêgô teng ka disondaga go ba isetsa Lefoko la Modimo.

Monna mongwe wa bôna yo o sa leng a ya bokgwêlwa kwa Koloni a sa le moša mme kajeno o setseng a tsofetse, a tla gae, a tlisa tlhôgô gae. A tla a rutilwe e le Mokresete e bile e le moreri wa Lefoko. Fa a fitlha a tla go Moruti Kaiser a inêela mo kerekeng a amogêlwa mo selallong sa Morêna a nna tokololô ya kérékê, mme a nêwa tirô ya go rérêla ba ga gabô Lefoko la Modimo. Leina la gagwê ké August Mokone.

Mme ya re ka gobane ké ba pusô ya Kgosi ya ba ga Mmakau gapê ba le gaufi le phuthêgô ya Polonia e e leng ya ba ga Mmakau, baruti ba buana gore Rantailane a tswê bodiseng ja Hebron, a tsênê mo bodiseng ja Polonia. Gompieno ba tlogile mo nageng ya Hebron ba agile mo go ya bôna e ba e rekileng, mme ba na le motse o o bidiwang Rama, o e leng kala ngwe ya phuthêgô ya Polonia.

Molekô o mogolo wa Tumêlô : E rile fa thutô ya Lefoko la Modimo e setse e aname le bontsi ja ditshaba tsa rona, e bile re setse re itlhoma gore : “Kagisô ! kagisô !!” ga tla sefefô se segolo sa ntwa ya Maburu le Manyesimane ka 1899-1902. Mme ntwa eo, rona ba re leng ba dikérékê tsa Makgowa a e seng Manyesimane, ya re fetogêla namane e tona ya molekô, gobane e sa le e aparetsa baruti ba rona e ba isa kgakala le dikérékê le ditirô tsa bôna. Mme ya re ka

baruti ba rona e ne e le ba basweu, ya re fa ntwa e tsaya ba basweu ra se ke ra salêlwa ke sepê.

Fa e ka be baruti ba ne ba tswakane le ba batsho, e ka be e rile ntwa e tsaya mofuta o mongwe, ga sala o mongwe wa baruti. Jaanong ya re ka gore e ne e le mofuta o le mongwe ntwa ya ba gogoretsa botlhe, ra sala re le dikhutsanyana re gadima-gadima re se na bo-rra le bo-mma.

Nna mo sebakeng seo,—Moruti o ne a setse a kgethile bana ba ba tshwanetseng go romêlwa kwa go ênê go tsêna sekolo sa kamogêlô—ke emetse go utlwa a re : “ Ba tlisê ; mme ya re boemong ja go re “ ba tlisê,” ga tla le le reng, “ Moruti o tshwerwe.” Jo ! jo !! Ra sala mo tlalelong e kgolo le mo molekong o mogolo. Barutisi ba bana le bagolo ba dikérêkê ra êma madi tsii! Re tla dirang ka metlhape ya dinku tsa Modimo tse di setseng mo diatlanyaneng tse di têtêmang tsa rona—gareng ga diphiri tsa mefuta-futa ? Mme ka pelê Modimo wa re gopodisa seane sa bo-rraetsho se se reng,

O re' tlogêlê le dikgomô

O alê thêbê O tlhabanê,

O se no O re : “ Rarê ga a yo ; ”

Ga se morêrô ga go rerwe

Ga go nyalwe kgaitsadiô.

Ao ! Ba tiya mokô., bana ba Mosadi yo Motsho, ba nêwa ké Modimo bonatla ba tshwara dikérêkê, ba tshwara dikolo tsa bana le tsa kamogêlô.

Baraedi ba leka ka thata go ba faposa le go leka go ba gapêla dikerekeng tse dingwe, le fa go ntse jalo ba se ke ba tsikinyêga. Modimo wa tsosa pelo ya kgosi ya Bakwena, J. M. 'Mamogale, a itshupa fa e le Rabatho gapê e le Mokresete, a re batlêla dithusô mo pusong, a re batlêla moruti yo a se keng a tsêwa le ba bangwe ka o ne a kaêga moeng, mme a mmatlêla tsela go tswa ga Mosêtlha go tla mo Hebron. A thusa Bakresete ka thêrô, le kolobetsô le selallô le go amogêla bana ba kamogêlô kerekeng ba ba

rutilweng ké barutisi ba bana mo sebakeng sa tlhabanô. Mo sebakeng seo sa ntwa pampiri ya go kwala e ne e tlhô-kafala thata mme le fa go le jalo, barutisi ba bana le bagolo ba diphuthêgô ba leka ka thata go bolokêla baruti dithulaganyô tse tsotlhe tsa ditirô tsa diphuthêgô tse di neng di diragala fa baruti ba se teng.

Modimo wa khutlisa sebaka seo sa pitlaganô, sa tlhabanô. Baruti ba rona ba ba neng ba isitswe kgakala le dikê-rékê tsa bôna ba boêla mo diphuthegong le mo ditirelong tsa bôna. Barutisi ba bana le bagolo ba diphuthêgô le tsôna diphuthêgô ba amogêla baruti ba bôna ka thabô. Mme ba ba naya ditirô le dithulaganyô tse tsotlhe tse di setseng di ntse di diragala mo sebakeng sotlhe sa fa bôna baruti ba ntse ba seô mo diphuthegong, mme baruti ba amogêla mo atleng tsa badiredi ba dikêrékê tsa bôna modirô otlhe wa dikêrékê, o ntse o bolokegile, ka thusô ya Modimo.

Mme sé sôna kè sa se itseng ké gore bôna baruti ba di bone jang ? A sengwe se se ka ikangwang se ka bônwa mo mothong wa bôna yo motsho ? Rona re gopola ka tebogô, kgosi ya tlotlégô, ênê J. M. Mamogale yo a thusitseng mo ditlalelong.

Go bakwê Modimo o o se keng Wa re tlogêla mo sebakeng sa tekô e kgolo eo :

“ E seng go rona Jehova,
E seng go rona,
Mme a kgalalêlô
E nnê go ineng la Gago,
Ke ntlha ya boitshwarêlô
Le boammarure ba Gago.” Pes. 115, 1.

KGAOLÔ YA 5.

THUTÔ YA TSWÊLÊLÔ PELE (EDUCATION)

Baruti ba rile go tlisa thutô ya Lefoko la Modimo e e dirileng baheidênen go fetoga Bakresete, ba dira le tsôna dikolo tsa bana mo diphuthegong tsa bôna. Mo dikolong tseo, bana ba ne ba rutwa go bala le go kwala. Thutô e kgolo dikolong e ne e le Tiragalô ya Bibele le Katekisima, le go ôpêla difela. Thutô ya dipalô (*arithmetic*) e ne e angwa go le gonyenyane fêla. Bana ba ne ba rutwa fêla ka puô ya bôna. Go ne go se na tekô (*examination*) fa e se ya moruti ya go tlhaola ba ba ka tshwanêlang go tsêna sekolo sa kamogêlô. Go ne go itshenkêlwa banna gongwe makau ba ba itseng go bala le go kwala pila, ba nêwa tirô ya go ruta bana mo dikolong, mme ba bidiwa ka leina la “Mmesetêrê.” Go ne go se na dibuka tsa sekolo, mme fa ngwana a feditse bukana ya sepeleng go ne go se na buka e o ka fetêlang mo go yôna fa e se Bibele gongwe Tiragalô ya Bibele.

Pusô e ne e se na sepê le thutô ya ngwana wa motho yo motsho ; mme Dikêrêkê tse e leng tsa Manyesimane jaka Wêselê le tsa Tšhêtshê (Church of England), tsôna di ntse tsa leka-leka go ruta bana mo dikolong, ka puô ya bôna mmôgô le ya Senyesimane. Gapê bommesetêrê ba bôna ba rutwa go bala le go kwala le go bolêla ka Senyesimane.

Moragô baruti ba rona ba Luthêrê ba dira Sekolo sa Seminare go ruta bo-mmesetêrê kwa Bethanie, moragô kwa Barseba, mme le sôna Seminare seo sa nna sa ruta fêla ka Setswana, kgopolô e le go ruta bokresete fêla e seng Tswêlêlô-pele (*Education*).

E rile fa lefatshe le wêla pusong ya Manyesimane, ga dirwa pitsô ya dikgosi tsa ba-batsho. Mo pitsong eo Kgosi J. M. 'Mamogale a kopa pusô gore a le rona Batho-batsho re rutwê thutô ya botswêlêlô-pele. Mme kopô eo ya Kgosi 'Mamogale ya fitlhêla le yôna Pusô e setse e rerile go nêêla Batho-batsho thutô ya botswêlêlô-pele. Ka ngwaga wa 1914, Pusô ya fêla ya amogêla dikolo tsa Batho-batsho mo diatleng tsa yôna. Mme bana ba simolola go rutwa puô ya Pusô, le go rutiwa thutô ya Tswêlêlô-pele go fitlhêla ngwana a feta Setlhôpa sa Boraro (Std. III). Le fa thutô e le selô sa botlhôkwa, le fa go ntse jalo, baruti ba bangwe ba leka go gana go nêêla dikolo mo seatleng sa Pusô. Mme ya re ka gore batsadi ba bana ba ne ba rata gore bana ba bôna ba rutwê Tswêlêlô-pele, baruti bao ba fenyêga, dikolo tsa tsêna mo diatleng tsa Pusô.

Mme Pusô ya tshwara bothata jo bogolo fa e simolola, gobane go ne go se barutisi ba ba kgônang puô ya Senyesimane ba ba lekanang palô ya dikolo, ka bontsi e le bo-mmasetêrê ba ba kgônang go ruta Setswana le Sesotho fêla. Ya re ka mogolo-golo a rile, "Ga e ke e imêlwa ké dinaka e le tsa yôna," Pusô ya dira leanô, ya se ke ya ntsha ba ba sa itseng Senyisemane gore e tsényê fêla ba ba se itseng ka gobane go ne go ka tsosa matshwênyêgô mo dikerekeng, mme Pusô ya dira leanô la gore barutisi ba Transvaal ba phuthêlwê felô go le gongwe, ka sebaka sa kgwedi fa dikolo di phomotse, mme ba rutwê bukana ya ntlha e e bidiwang "Primer," ba e rutwê ké yo mongwe wa banna ba Thutô. E le gore bôna barutisi ba yê go ruta bana ka ngwaga otlhe.

E rile fa ba kôpana mo felong fa ba tla rutêlwang teng, ba kôpana ba sa itsanye gobane ba ne ba tserwe ke dikêrêkê-kêrêkê tsa mefuta e mentsi, ba bangwe e le barutisi, ba bangwe e le bo-mmasetêrê. E rile fa bo e-sa, ya lla tshipi, ba tsêna mo tlung e tonana ya sekolo e go tweng "Institution." A êma ngwana wa lejathapi a re : "Nkhwete-nkhwete-nkhwete !" Joo ! ga re : "tsho !" ra êka ditsêbê

rona bo-mmesetêrê, re sa utlwe sepê. Ga êma mosimane yo mosesane wa morutisi a re : “ Moruti a re, a re a re.” Nya ra phela le batho ba ba molemô, ba nna ba re phuthololêla ra ba ra nama ra lemoga se se dirwang, ra fetsa bukana ya *Primer* le dithutô tsotlhe tsa tshimologô ; mme ra boêla kwa dikolong tsa rona ra simolola go ruta bana ba dikolo tsa rona tse re tswang go di rutwa, ra ba ra ba bolêlêla gore morutisi wa bana ga se Mmesetêrê, mme ke “ Teacher ”—titshêrê.

Ka ngwaga wa bobedi ga tswêlwa pele ga rutiwa ya bobedi bukana e e bidiwang “ *Infant Reader.* ” Ga nna ga tswêlêlwa-pele jalo ka dinyaga go fitlhêla go be go bonwe barutisi ba nnete ba ba rutegileng.

Re kile ra duba botsho fa re simolola go ruta thutô ya tswêlêlô-pele. Le fa go ntse jalo thutô e yôna le rona “ bo-mmesetêrê ” re neng re sa ipelaele mo go yôna ké ya Bokresete ya Bibele ; mo go yôna re ne re sa boife barutisi ba dikêrêkê tse dingwe.

Ka tsatsi le lengwe re le mo sekolong sa barutisi sa Kilnerton ga tsêna yo mongwe yo mosweu a re fa a ntse a bua le morutisi wa rona, a botsa a re : “ A barutisi ba dikêkê tsa Majêrêmane, a le bôna ba teng ? ” Karabô ya re : “ E, ba teng, ké bôna ba ba bokoa ba.” Joo ! Tsa nketsang ditlhong ! Ga ke itse gore bagaetsho bôna ba di utlwile jang tsa leo letsatsi ; nna di ntlhabile. Gapê tsatsi lengwe motlhatlhobi a êtêla se sengwe sa dikolo. Ya re fa a ntse a tlhatlhoba a laêla morutisi go kwalêla bana sengwe mo bolakaborotong (B.B.), mme morutisi a re : “ Yes, Sir.” Motlhatlhobi a boêla a laêla gapê, mme morutisi a boêla a arabêla mo botshong gapê, “ Yes, Sir.” Ké fa tôlôkô e tla tôlôka mme morutisi e ba gôna a tlhaloganyang se o ntseng a se arabêla mo botshong. Thutô ya tswêlêlô-pele e simologile ka bokoa fêla jaka ke setse ke boletse.

Mme kajeno e golagodile, barutisi ké ba ba nonofileng, ba ba nang le Makwalô (*Certificates*). Bana ba rutwa go

fitlha ba feta setlhôpa sa Botshelêla (Std. VI). Moeti wa Lekgowa o ka se ke a tlhôla a kgêtha barutisi ba gaetsho ka bokoa. Tôlôkô e ka se ke ya tlhôla e tôlôkêla “ bo-Yes Sir.” Le fa thutô e ise e gole tôta, le fa go ntse jalo e tlogile boseeng e fitlhile bosimaneng le borwetsaneng, tsholofêlô e teng ya gore e tla fitlha bonneng le bosading, ké go re bothong jo bo tletseng.

Re leboga Pusô e e re ntshitseng tebetebeng ya bosilo mme e sa lekang go re isa tlhalefong. A go bakwê Modimo o o re neileng pusô e e re tlhalefisang. A Modimo o o godisang le mefêrô mo nageng o godisê thutô ya Bokresete le ya Tswêlêlô-pele mo ditšhabeng tsa rona tsa Afrika ya Borwa.

Tswêlêlô-pele ya ditirô (Civilisation) : Ke setse ke buile ka thuto ya bodumedi le ya tswêlêlô-pele ka fa di simologileng ka teng mo go rona.

Jaanong ke rata go bua le ka thutô ya tswêlêlô-pele ya ditirô ka fa e simolotseng ka teng mono. Kgosi Tšhaka morw'a Senzangakhona le molaodi wa Makgotla a gagwê, Umzilikazi morw'a Matšobane, ba ne ba humanegisitse lefatshe la Afrika ya Borwa fa e rileng fa ba le tlogêla ba be ba le tlhatswitse ka metsi go se sepê, sepê, sepê gagolo Transvaal. Ya re fa Makgowa a fitlhêla batho ba se na sepê, mme bôna Makgowa ba na le diruiwa tse dintsi, mme ba di tlhôkêla badisa, modisa fa a disitse a ba a fetsa ngwaga a ntse a le mo tirong o tla duêlwa ka kgomo ya lerôjana. Mme tirêlô eo ya bidiwa jara (*jaar*).

Ya re ka gore go ne go se na ditirô fa e se go tsoma, ka go ne go se sepê se se disiwang, ka dikgomo di ne di feetswe ka lefêlô ké Matebele, ao ! ba gana go utlwa bana ba mosadi wa Afrika, basimane le banna ba ba ikutlwang ba tshêlégêla mo makgoweng ba nna dijara. Ba bidiwa bo-Janabare, bo-Aporêlê, bo-Mmei, bo-Atonse, jalo, jalo, mme le fa ba ne ba itêwa botlhoko, le fa go bile go le jalo, ba di menya-mêla, ba ithatafatsa ka seane sa bo-rrabô-mogolo se se reng.

Mmatla-kgomo kôlômêla

O etse mfata-sediba.

Ba di gapa, ba gapêla batsadi, ba gapêla bo-malom'a-bôna, ba ba ba gapêla le kgosi ya bôna, ba ba ba ikgapêla. Ya ba ya re fa ba bolola bogwêra ba bidiwa ka leina la Maloma-kgomo ya ba leina la mophatô wa bôna.

Ba bangwe ba rêka dikromo le dihutshane ka mabêlê le matsoko mo go ôna makgowa. Mme ya re ka ba ne ba rata tse dinamagadi bogolo go tse ditona, e re fa ba bapatsa ba re, "Bôkô-masari! Sekapa-masari." Ké go re podi e e namagadi, nku e e namagadi. Ka yôna papadi eo ya diatla le ya thekisô ba rua dikromo le dihutshane, ba ba ba nama ba rêka dithunya ka tsôna mo go ôna makgowa a di tswang mo go ôna, tsa ata, ba ba ba rêka dikoloi le megoma ya sekgorwa.

Banna ge ba ntse ba le mo medirong ya bo-baase ba nna ba tsaya malebêla mo ditirong tse di dirwang ké bo-baase ba bôna. Ba ithuta ditirô tsa sekgowa ba bêtla dijokwe le dikei, ba loga diteu le diterôpô le dime, mme ba golêga dipholo tsa bôna ba kgôkgôsêla ka makoloi a bôna, ba tswêla pele. Ba nama ba ikagêla matlo a sekgowa, ba ithulêlla. Ba itse go aga ka matlapa le setena se ba se iphorometseng ka nosi, ba ithulêlla ka disênkê, ba itshegêla diaparô tsa sekgowa, ba tshola ditulô le dijana ba jêla mo ditasoleng, ba tsamaya ka dibaesekele le mebotokara e e itheketsweng e e bileng e itsamaisediwa ké bôna bana ba "bo-ou Aporêlê" le "bo-ou Sabina."

Mme kana tswêlêlô-pele e e kana e, bogolo ja yôna, ga e a rutiwa mo sekolong, mme e tserwe fêla malebêla ké ma-Afrika fa di ne di diriwa ké bo-baase ba bôna. He! Iona banna ba gaetsho! Lo bôna jang? Fa re lekanya tswêlêlô-pele ya kajeno le ya sebaka sa fa makgowa a tsêna mono fa ba Afrika ba ne ba se na le sepê, mme ba simolola go rêka dipudi ka dikgochu tsa motsoko (kgohu ké motsoko o o thugilweng wa bopiwa se e keteng senkgwe), re ka re ka

nnete batho ba rona ba tsweletse kwa pele. Gapê mo dikolong tsa bana ga go barutisi ba makgowa fa e se kwa dikolong tse dikgolo kwa ba rutang ba ba setseng ba sugilwe ké barutisi ba batsho. Ba bangwe ba setse ba na le mabenkele a e leng a bôna, bangwe ba itheketsé dipolasi le diténtshê ba aga matlo a a sa fetaneng ka gopê le a makgowa. A ko O yê makeiseneng a bo-Sophiatown O bônê gore a ke a fosa fa ke re : “ Batho-batsho ba tswêlêla-pele.” Mme le fa makgowa a leka go ba isa tlase, bôna ga ba dumele go ya tlase ba gwataletse, ba re : “ Ga go golelwé kwa tlase, go golêlwa godimo.”

Go bile ga bolêla mogale yo mongwe wa masweu-manna ditulô, a êma ka maoto a mabedi, ngwana wa ga *Noi* a re : “ Kajeno ntwa e e tla lowang ké ba Basweu le ba Batsho, e ka se ke ya tlhôla e ba ya marumô, mme e tla ba ya Phadisanô ya medirô.” Ga re itse gore gôna motlhang letsatsi le tlhabang le yo motsho o ka rutwang jaka yo mosweu, ngwana wa *Noi* foo o tla tshwara jang.

Thutô e e setseng e le teng mo go rona ba Batsho e sa le nyenyane bogolo fa e bapisiwa le ya ba Basweu. Motho yo mosweu mo thutong ké senatla sa monna ; mme yo motsho ké lesea le le ithutang go abula le go êma, mme jaka re itse gore ngwana yo o jalo o ka se ke a kgôna go iphedisa kwa ntlê ga batsadi ba gagwê, le rona ba Batsho ga re ise re nonofe go ka iphedisa ka bo-ga-rona. Re sa ntse re tshwanêla go tsamaisiwa. Ga se botlhale go ithoma re nonofile. Nya, ké namane e tona ya phôsô go ka ithoma jalo. Re tshwanetse go kgomarêla letsêlê, ra le anya, ra ba ra tapolla le morokotsô wa lôna, gore re tlê re nonofê, re golê, re tiê mo dithutong tse tsotlhe : ya Bokresete le ya Tswêlêlô-pele le ya Tswêlêlô ya Ditirô. Gapê re rape leng Mmopi wa legodimo le lefatshe, Yo o se nang kgethollô ya batho gore le rona A re tshegofatse, “ Eh, le rona.”

“ Rra, Ntshegofatse. Eh, le nna ; ” (Gen. 27, 38) mme re tle re golê mo Bokreseteng le mo Tswêlêlô-peleng, re tle

re kgônenê go phela le go swêla mo tseleng ya polokô ya Modimo.

Molemô wa thutô : Thutô ke selô se segolo sa botlhô-kwa. E molemô, e thusa mo matlhakoreng a otlhe. Mo dilong tsa môya le mo dilong tsa nama. Mo dilong tsa legodimo le mo dilong tsa lefatshe. Ké yôna e e godisitseng batho ba Basweu Ga se mmala o mosweu o o ba tlhalefisisitseng, o o ba tlhatlositseng mme ké Thutô.

Jaka re bôna ka bana ba rona ba ba neng ba isitswe ka bogkôba kwa Amerika, thutô e ba tlhatlositse, ba ntse ba le batsho. Ba godile ba re feta kgakala, mme ké thutô e e ba kukileng jalo ; ké yôna e le rona kajeno re e neilweng. Ké yôna thutô e e tlisitseng kagisô mono ; mme ka yôna kagisô ya thutô, re agile re iketlile. Ditshaba tse di neng di tlhôane di bolayana, kajeno di agile mmôgô ka kagisô. Gapê mahumô a lefatshe leno a a neng a fitlhilwe fa thutô e ise e nne teng, kajeno thutô e a senotse rc phela ka ôna. Dibaka tse di neng di katogane thutô e di atamêlantse ; mme maêtô a a neng a tsamaiwa bokete, kajeno a tsamaiwa bonôlô mo lefatsheng, mo metsing, le loaping, mme bogolo go tse tsotlhe. Thutô e re nôlôfaditse e bile e re buletse kgôrô ya Bophelô jo bo sa khutleng. Thutô e tôta e le molemô,¹ bagaetsho !

Dira tsa thutô : Thutô le yôna e na le ditsala tse di e thusang, gapê e na le dira tse di e tlhoileng. Mme fano ke tla bolêla fêla ka ga dira tsa thutô. Ke bua ka mefuta e meraro ya batho e dira tsa thutô di atisang go bônwa mo go yôna, e e leng (a) Setshaba (b) Marêna (c) Baruti.

(a) *Setshaba* : Setshaba fa se phela mo 'fising la boheidênenê, mme thutô e nyatsa mekgwa eo, setshaba se simolola go tlhôya thutô. E re fa se palêlwa go tlhabana ka marumô, se e lwantshe ka makgotlana a manê a a sa lweng

¹Molemô : Lentswe lena "molemô" mona go lemogwê gore le tshwere kgopolô tse pedi : (1) molemô wa go loka le (2) molemô wa go alafa jalo setlhare se se alafang malwetse, se tlhatswang, sa a fodisa.

ka marumô, mme a a lwang ka bogale. La pele : ba ba sa rateng go utlwa sepê : la bobedi, ba ba utlwang mme ba sa amogele sepê ; la boraro, ba ba utlwang ba be ba dumele, mme fa melekô e tsêna ba tenege ; la bonê, ba ba utlwang, ba be ba dumele, mme ba sa rate go latlha mekgwa ya lefifi, ya boheidênenê ; mme mekgwa eo ya boheidênenê, ya re fa e gola e nama medi e itsetsepele mo dipelong e hupetse e bolaye thutô mo dipelong tsa batho, mme ka mokgwa o, fa batho ba ne ba kile ba dumêla, fa ba boetse ba kapologile, ba fetoge dira tse di tshabêgang tsa thutô. Jaanong hê, makgotlana a manê ao, a mo setshabeng. Bonê ja ôna ké dira tse di senyang Thutô.

(b) *Marêna* : Fa marêna a sa rate thutô a kotsi go feta setshaba. Metlheng ya marêna a bogologolo jaka marêna a ne a ipusa, marêna a ne a bolotsa dira go tshwara le go bolaya ba ba ratang thutô. Utlwang se Tau-tona ya Egepetô e se buang, e re : "Jehova ké mang yo nka utlwang lefoko la gagwê o lesa Baiseraêlê go ya ? Ga ke itse Jehova mme le gôna nka se ke ka lesa Baiseraêlê go ya." Marêna a kajeno ga a sa na thata go bolaya Majakane ; mme le fa go ntse jalo ba bangwe ba tlhabana le thutô ka go tshegetsa mekgwa ya seheidênenê, Bogwêra, Bojale, Basadi ba bantsi le tse le tse.

Le galê ga se Marêna a otlhe a a tlhabanang le thutô. Mo gare ga ôna marêna go teng a mangwe a a ka bidiwang ditsala tse dikgolo tsa thutô. Mme a mangwe ôna le fa a sa supege go Iwantsha thutô ka ditirô tse di bônalang, le fa go ntse jalo, ga ba e thuse ka sepê, gobane ga ba tsene mmôgô le setshaba mo kerekeng go utlwa Lefoko la Modimo gapê fa baheidênenê ba boloditse ngwana wa Mokresete kwa ntlê ga go rata ga batsadi ba gagwê, ôna marêna ao ga a tlhokomele go sekisa babolotsi bao. Le gôna fa Bakresete ba ditshaba tsa ôna ba na le modirô wa kagô ya kérékê le fa e le ya sekolo, le fa Bakresete bao ba ipegile mo mareneng ao a bôna ba kopa go thusiwa ka sé gongwe sé, mme ôna

marêna ao a sa tsee-tsia dillô tsa Bakresete bao ba ditšhaba tsa ôna, a a jalo marêna, le fa a bile a sa lwantshe thutô ka medirô e e bônwang ka matlhô, le fa go le jalo a e bolaya ka tlala, fa a na le thata go e thusa mme a e tlogêla gore e bo-pamêlê mo dikgorong tsa ôna jaka Lazarus a bopametse mo kgorong ya Mohumi. A a ntseng jalo marêna a ka nna a bidiwa ka tshwanêlô dira tsa thutô.

(c) *Baruti* : Mme le mo go bôna baruti go teng ba ba ka nnang ba bidiwa dira tsa thutô gobane ké gantsi thutô e ntseng e senyégêla mo diatleng tsa bôna baruti. Jaka mo metlheng e Baiseraélê kwa Sinai Modimo Ó be Wa akofisa Mošê Wa re : “ Akofa O fologê gobane setšhaba sele sa Gago se O se ntshitseng Egepetô se ipodisitse.” Mme fa a tla ka diapharitla a fitlhêla go fêla go le jalo a ba a goa a raya Moruti Aarone a re : “ Kana setšhaba sé se Go diretse eng, fa O tla se digêla mo sebeng se se kana kana ? ” Ex. 32, 21. Mme ka sebe seo ga swa batho ba ba ka nnang ’kete tse tharo, Ex. 32, 28.

Gapê Baruti ba Baiseraélê ba diga thutô, Jesu a ba A goa A re : “ Go latlhêga lona Baruti ba molaô ! gobane Lo tlositse selôtlêlê sa kitsô, lona ga Lo a ka la tsêna, mme ba ba tsênan Lwa ba kgoreletsa.” Luke 11, 52. E bile ya re baruti bao ba lemoga gore o bone phôsô ya bôna mme ba mo rêmela leso ; mme Ènê a ba utlwêla botlhoko A ba A ba llêla ka botlhoko A re : “ Ijoo ! fa O ka be O sa le O itse tse di neng di tla Go agisa le ka tsatsi leno la Gago ! mme jaanong di fitlhilwe mo matlhong a Gago, Wêna motse wa Jerusalêma.” *Y.O.IOAP*

Gapê Kérékê ya Jesu Kresete e e simologileng Jerusalêma letsatsi la Pêntêkoste, ya gola ya ya le lefatshe, mme moragô ga sebaka thutô ya Lefoko la Modimo ya senyégêla mo diatleng tsa baruti : ga ba ga tsoga banna go šafatsa kérékê ya Modimo. Mme le bôna Bašafatsi (Reformers) bao ba ikgaogantse ba ntse mapukana-pukana ba ipitsa ka mainana-inana. Lesômô le lengwe le ipolêla fa e le lôna

le le tshwereng dinnete tsa thutô ya Lefoko la Modimo ; mme le lengwe le ipolêla fa dinnete di tshwerwe ké lôna. Jaanong rona difofu tse di tsamaisiwang re tla ya kae fa e le fa re utlwa lekutu-kutu la batsamaisi ba lwêla fa pele ga rona ?—Mongwe a re : “ Mo-Luthêrê towê ! ” yo mongwe a re : “ Mo-Tšhatšha towê ! ” yo mongwe a re : “ Mo-Fora towê ! ” yo mongwe a re : “ Mopapatisi towê ! ” “ Mo-Wêsêlê towê ! ” le tse le tse ?

Mme fa leratla leo e le la bašafatsi ba thutô fêla, rona difofu le digôlê re gakologêlwa se ba kileng ba se re rérêla tsatsing le ba neng ba eme sefateng fa ba re : “ Jesu Ó rile : ‘ Bogosi bongwe le bongwe jo bo ikgaoganyang bo tla nyele-diwa, mme ntlo e e ikgaoganyang e tla wa.’ ” Jaanong re mo poifong gore thutô ya botlhôkwa e re e filweng ké Modimo ka boutlwêlô-botlhoko ja Ôna, a e tla sala le go gola mo go rona ? A kampo e tla senyêga le go wa ka ntlha ya go tlhabana le go sa utlwaneng ga dikêrêkê le baruti ba tsôna ?

A re ikôpanyeng mmôgô rona Ditšhaba le Marêna le Baruti, re tshwaraganeng ka diatla tsa thapêlô go huparêla thutô e mo go rona ka galê gore thutô e golê e nnê mo go rona ka galê mme e re phedisê. “ Mongwe le mongwe yo o fapogang, mme a sa nne mo thutong ya ga Kresete ga a na Modimo ; yo o nnang mo thutong ya ga Kresete, yoo o na le Rara le Morwa.” 2 Joh. 1, 9.

KGAOLÔ YA 6.

LEKGOLO LA DINYAGA.

Kajeno go fetile dinyaga di le lekgolo thutô ya Bokresete e ntse e tsene mo ditšhabeng tsa batho ba batsho ba lefatshe la Afrika ya Borwa ; mme thutô eo e tlisitswe mono ké batho ba basweu ba ba tswang kwa moseja ga mawatlê, ba e leng batho ba ba tswang mo merafeng e e fapaneng le mo

mebusong e e fapaneng le mo dikerekeng tse di fapaneng. Mme ba botlhe bao ba ne ba bolêlla batho ba Afrika fa bôna e le baruti ba romilwe ké Modimo go itsise bôna ba Afrika fa Modimo o ratile lefatshe mme o le neile Morw'a Ôna yo o tsetsweng a le nosi gore mongwe le mongwe yo a dumêlang mo go Ènê a se ke a fêla mme a nnê le bophelô jo bo sa khutleng.

Ba supa gore Morw'a Modimo o bapoletswe batho mme madi a gagwê a a tshologileng jaka fa a swa mo sefapanong a tilapisa dibe tsa batho botlhe. Jaanong barongwi goingwe baruti ba ba setseng ba rerile, ba dirile. Ba bantsi ba bôna ba setse ba swetse mo tirong eo, mme le bôna ba-Afrika ké ba ba balwang ka masomê a dikete, ba ba utlwileng dithêrô tsa baruti mme ba ba kolobeditsweng, ba ba bileng ba le baamogedi ba selalêlô sa Morêna. E bile bontsi ja bôná ba swetse mo tumelong eo, mme tirô e, e ntse e tsweletse pele ka galê.

Jaka ke rile e ne e le ba merafe-rafe le ba dikêrêkê-kêrêkê ka mokgwa ó ga ba lese go ntshana diphôsô ; ba bangwe ba êmêla ya bôna kérêkê, mme ba bôna e ngwe kérêkê diphôsô, mme e re ka mongwe le mongwe a ikêmêla, ga re ka ke ra atlhola gore tôta ba ba dirang tshwanêlô ké bafe. Mme kajeno sebaka se atametse, molekodi wa medirô ya thutô ya lefoko la Modimo o gaufe ; leina la molekodi yoo ké Morêna *Lekgolo la Dinyaga*. Jaanong re a solofêla gore ênê o tla didimatsa kgaruru e e neng e le mo badireding ba merafe-rafe le dikêrêkê-kêrêkê.

E ne e rile fa ba simolola go ruta batho ba batsho, ya be bôna ka nosi ba sa utlwane ba sa dumêllane mo dithutong tse ba di rutang. Ba bangwe ba re nnete ké e e bolêlwang ké rona, ba bangwe le bôna ba bolêla jalo ; mme leratla leo la go se dumêllane ga batsamaisi ba thutô la ba la nama la tséna ba Batsho mo ditsebeng, la ba tilhakanya ditlhôgô, ba ba ba sala ba eme fêla ba sa itse gore “ bo-monere ” fa e le

fa ba re ruta ba sa utlwane, e leng tôta thutô ya nnete ké e e rutwang ké monere mang ? Mme le fa go le jalo ba-Afrika bangwe le bangwe ba kgomarêla wa bôna moruti fa ba setse ba lemogile gore baruti le fa ba fapano mo dilong tse dingwe le ka maina a dikérêkê tsa bôna, mme le fa go ntse jalo, ba kôpana mmôgô ka go dumêla mo go Jehova Modimo Rara le Morwa, le Môya o o Boitshêpô. Mme go tsamaile ka dinyaga tse di lekgolo. Jaanong motlhatlhobi o simolotse go lebêlêla ka tlhôkômêlô tse di dirilweng ké baruti ka dinyaga tse di lekgolo tse.

Tse dingwe ké dikérêkê tse di nang le diphuthêgô tse dintsi le matlo a dikérêkê le matlo a dikolo le dikolo tsa go ruta boruti le tsa borutisi le ditirô tsa diatla. Ba na le baruti ba basweu le ba batsho, barutisi ké ba ba tlhalef-leng, bana ba tswêlêla pele. Diphuthêgô di itshupa fa di dule mo bohei léneng. Phegêllô ya baruti bao e ne e le go thusa mo-Afrika mo dilong tsa môya le mo dilong tsa mmele, e seng tsa môya fêla mme le mo go tsa mmele ; gobane môya o mo mmceleng jaka motho a ka se ke a boloka mabêlê a a mo kgetsing fa a sa boloke kgetsi ; gobane mabêlê a mo kgetsing fa O rata go boloka mabêlê, boloka kgetsi Go ntse jalo fa O rata go boloka môya wa motho ; boloka le ôna mmele wa gagwê. Jaka Jesu a re : " Ba ntse le nna malatsi a le mararo mme fa ke ba phatlalaletsa magaeng a bôna ba sa ja sepê, ba tla idibala mo tseleng gobane bangwe ba bôna ba tswa kwa kgakala."

Ka ga tlhatlhobô ya dikérêkê go tla itse Ônê Motlhatlhobi ; fêla ke llêla Kérêkê e e tla fitlhêlwang e sa dirisa dipontô tsa mong wa modirô, gobane katlhôlô ya teng ké e e tshabêgang gagolo. Mme ke rapêla gore molemi a ke a bê pelotlhomogi le setlhare se se se nang dikungwa, a ke a buê le mong wa tshimo a re : " A ko O se lese O se ke Wa se réma ke tle ke se lemêlê ke se porolosê ke se tshêlê mmûtêlê, ke se nosetsê, e ka re gongwe sa ungwa dikungwa tse di batliwang ké Morêna wa tshimo."

Kgaoganô ya Dikérékê : Rona Bakreseté ga re thabisiwe ké go bôna Kérékê ya Modimo e kgaogantswe ka masômô a mantsi-ntsi, a a sa utlwaneng, a a bileng a tlhabana mmôgô, mme e tswe re ka be re utlwana, re ratana jaka Morêna wa rona Yo e leng Ènê mong wa Kérékê a boletse, A re : “ Se se ka bontshang batho gore Lo barutwa bame ké fa Lo ratana.” Mme jaanong moo sebakeng sa go utlwana le go ratana, re a ganetsana e bile re supiwa ka maina a mantsi a a ntseng a okediwa a dikérékê tse di ntseng di ikgaoganya ka galê.

Kérékê ya pele ya Modimo ké ya setshaba sa Baiseraêlê e baruti ba yôna e neng e le Mošê le Aarone yo e neng e le moperisita yo mogolo. Ntlo ya ntlha ya Kérékê ya bôna e ne e bidiwa Tabernakêla. Moragô Kgosi Solomone a aga e kgolo e e bidiwang Tempele. Mme e rile moragô-nyana mo sebakeng sa morwa wa gagwê kérékê ya kgaogangwa ké Jeroboame, motlhanka wa Solomone, a tlogêla ntlo ya Tempele a itirêla ditshwantshô tsa dinamane a baya e ngwe kwa Bêthêlê mme e ngwe kwa Dane gore setshaba sa Isaraêlê se se busiwang ke ênê se se ke sa ya kerekeng kwa Tempeleng e e leng Kérékê ya Bajude, mme ba yê kwa Bêthêlê le Dane tse a reng ke Kérékê tsa Isaraêlê. Mme fa Morêna Jesu a tlie lefatsheng a fitlhêla baruti ba Kérékê ya Jehova e e leng Tempele le bôna ba fapogile tsela ya Tirêlô ya Modimo, go bile go rekisetswa mo Tempeleng, mme Jesu a galefa A lêlêka barekisi A re : “ Go kwadilwe ga twe : ‘ Ntlo ya me ké ya thapêlô,’ mme lona lo e dirile legaga la dinokwane.”

Gapê Jesu A bolêlla setshaba a re : “ Baruti ba lona ba e leng Bakwadi le Bafarasai, ba nna mo setulong sa Mošê, mme tse tsotlhe tse ba di lo bolêllang go di boloka, lo di bolokê lo be lo di dirê ; mme fêla lo se ke lwa dira tse bôna ba di dirang, gobane ba bôfa merwalô e e bokete go rwallwa ba e rwesa mo magetleng a batho, mme bôna ga ba rate go ka e ama ka o mongwe wa menwana ya bôna.” Matt. 23,

1-36. Gapê A bolêlla baruti bao A re : “ Bônang ntlo ya lona e tla sala e le lesope, gobane ke lo raya go tloga jaanong ga lo kitla lo tlhôla lo mpôna, go tlo go tsamaê lo be lo re : ‘ Go tshego fala yo o tlang ka leina la Morêna.’ ”

Kérékê ya bobedi ké ya kgolaganô e ntsha e e leng ya Jesu Kresete Morêna wa rona, e A e theileng ka nosi mme ya re fa a tla tlhatlogêla kwa legodimong, A laola barutwa ba Gagwê A re : “ Dithata tse tsotlhe ke di neilwe mo legodimong le mo lefatsheng. Ké gôna ; Yang lo rutê merafe yotlhe lo e kolobetsê mo ineng la Rra le la Morwa le la Môya o o Boitshêpô.” Mme A ba bolêlla gore ba se ke ba phakisetsa go ya tirong e ba e romilweng, ba êmêle Mogomotsi yo e leng Môya o o Boitshêphô. A ba A ba bolêlla gore ba se ke ba tlogêla motse wa Jerusalêma gobane Môya o o Boitshêpô o tla tla go bôna teng. Mme ka nneta wa fêla wa tla go bôna mo Jerusalêma ka moletlô wa Pentekoste, wa ba bonesa wa ba itshepisa wa ba ruta le go ba bolêlla ditirô tse dikgolotsa Modimo ka dipuô tsa ditshaba.

Go tloga foo ba simolola go aga Kérékê ya Jesu Kresete ka lôna tsatsi leo. Mme barutwa ba ba bidiwang Baapostoloi ba ya le lefatshe ba tlhôma Kérékê ya Mong wa bôna, mme ba baya baruti go atisa Kérékê. E rile sebaka se ntse se e-ya, le Baapostoloi ba setse ba sule botlhe, Kérékê e setse e le mo diatleng tsa baruti, bôna baruti ba itshenkêla yo mongwe go nna tlhôgô ya Kérékê yotlhe ; mme a aga mo motseng wa Rôma a bidiwa Mopapa, mme e rile sebaka se ntse se e-ya tsôna ditlhôgô tsa Kérékê tse di bidiwang Bapapa ba simolola go ikgodisa, ba okamêla le marêna a ditshaba, ba sôkamisa Tirêlô ya Modimo ba rapêla baswi le ditshwantshô. Gapê ba rekisa dikwalô tse ba reng fa motho a di rekile dibe tsa gagwê di tla itshwarêlwa, etswe le morêrô e le go iphuthêla ditshêlêtê fêla.

Mme ga tsoga banna ba dinatla mo tumelong ba ganetsa thutô e sôkameng ya bagolo ba Rôma. Ba êma ba itshegegitse ka buka ya Modimo. Mopapa a gakala, a rogaka ba

ba sa dumêllaneng le taolô ya gagwê. A bolotsa dira go tshwara le go bolaya, mme dikete tsa bolawa ka dintšho tse di tshabêgang le tse di sisimosang. Bofelong baemedi ba Bibele le bôna ba itlhabanêla ba fenza, mme ba tlogêla Kérêkê ya Rôma ba dira Férêkê ya Evangedi, ba bidiwa Baprotestante

Ba Kérêkê ya Evangedi ba dule jalo mo Kerekeng ya Rôma. Mme ba supa mabaka a ba sitwang ké go sala mo kerekeng eo ka ôna, jaka Baapostoloi le bôna ba supeditswe ké mong wa bôna mabaka a ba sitilweng ké go sala mo Kerekeng ya Baruti ba molaô ka ôna. Jaanong a re late-leng Kérêkê ya Evangedi e e ntshitsweng mo bothateng jo bogolo ja ditshenyêgêlô tsa maphelô a mantsi-ntsi a batho, go le thata, tshosa e tlhaba motho, selêpê se kgaola motho molala, madi a tshologa phašaphaša, mme ba itshoketse go swêla bonnête ja Lefoko la Modimo.

Jaanong hê ba dule mo taolong ya Mopapa, ba ntse ba tshotse Bibele mo diatleng. Ba nna fa fatshe, banna ba Modimo gore ba buê mmôgô ka ga Kérêkê ya bôna ya Evangedi e e leng Kérêkê e ngwe fêla. Ba bula Bibele ba e bala ba leka go e phutholola ba ntse ba le ngatana e le ngwe, mme e rile ba ntse ba ya le yôna jalo, ba fitlha temaneng tse di kwadilweng mafoke a a reng : “ Sé ké mmele wa me o o nêlwang ka ntlha ya lona.” “ Sé ké madi a me a kgolaganô e ntsha a a tshololwang ka ntlha ya ba le bantsi.”

Ya re fa ba fitlhile mo temaneng tseo, lefoko la diragala le le rileng, “ Ké mang yo o itsileng boitlhomô ja Morêna, gongwe mogakolodi wa gagwê e ne e le mang ? ” Ao ! ao !! Naka tsa sita baletsi. Thutô ya Selalêlô sa mmele le madi a Jesu Kresete mo senkgweng le mo veineng ya thuba baruti ba Evangedi lepêtlékê. Calvin a re a tloga a leba kwa ntlha ele, ya re Luthêrê a leba ntlha ele, Zwingli le ênê a leba kwa, le ba bangwe le bôna jalo. Bongwe fêla ja Baruti ba Evangedi ja thubêga mme ga dirêga maina a

mantsi a re a bônang kajeno a dikérékê tse di neng di le Kérékê ya Evangedi. Ké eng se se ba kgaoganyang etswe ba sa supe lebaka la molato o o dirilweng ké ba bangwe, fêla jaka mabaka a a supilweng mo kerekeng ya Bajude le ya Barôma tse re setseng re utlwile ka ga tsôna ? Lona ba Kérékê ya Evangedi Lo supa eng ?—A be morôka ênê a supa maru ? Lo thubilwe ké eng mo bongweng fêla ja lona ? A Wa re gongwe fa Lo sale Lo leka gore le lona Lo itse boitlhomô ja Morêna, Lo be Lo leka go nna bagakolodi ba gagwê ? Mme hê, fa e ka be Lo fêla Lo dirile jalo Lo tle Lo bone se Lo se kotutseng ? Mafora, Ma-Luthêre Ma-Tšhatšhe, Ma-Wêsêlê, Madatšherefômô, Mapapatisi, Ma-Presipetiriane, Makonkorokeiše le tse dingwe tse dintsi mme tshotlô eo e tswa mo Kerekeng ya Evangedi.

Jaanong lona beng ba maina a Lo tlie mo go rona ba Afrika ka ôna maina a mantsi-ntsi ao, Lo re fitlhêla re le kgolokwe e le ngwe fêla ya Boheidênê ; mme lwa feta lwa re ruta go kgaogana lwa re : " Yo, O se ke Wa utlwana le ênê ké wa kérékê e e fapogileng." Mme kérékê yôna e wêna moruti O reng e fapogile, e ntse e le yôna ya Evangedi jaka ya Gago. Jaanong hê, rona Ma-Afrika re setse re gothla-gothhilwe go senyana ka thutô ; mmadi O nkutlwê pila, ga ke re re rutilwe, mme ka re re gothhilwe fêla, fa re itse fêla go bala buka re ntse re kwakwaetsa, re setse re ipatlêla bo-makailwane ba diletswana ba re tla ithutang go tsamaya re ntse re kgaola diphuthêgô gore le rona re tle re itirêlê dikérékê tsa maitirêlô mme re fetolê dikôlôrô re di ngomêllê kwa moragô re yê kwa baruting ba maitirêlô ba re dirê le rona go nna Baruti ba maitirêlô ; e le gore fa go ka kgônêga re be re itirêlê Legodimo la maitirêlô.

Utlwang lona banna ba Modimo ! Bulang matlhô Lo bônê gore bobe jo ke buileng ka ga jôna ja maitirêlô a bo tôta bo le teng a kampo ké nna ke ratang go bolêlla babadi dilô tsa metlae, tse di seng teng ? Nya bo-rra, ga go jalo. Mme nna ke bôna gore se se ntshang batho mo dikerekeng

tsa bôna ké (a) *Boikgodisô* : Motho yo a tletseng boikgodisô o rata go bônwa ké batho, mme fa a neilwe tirêlô mo kerekeng o batla go nna wa ntlha mo go badiredi ba ba jaka ênê, mme fa a sa newe se o se batlang, o latofatsa kérékê ya gagwê, mme o ya kwa dikerekeng tse a gopolang di tla mo godisa, gongwe fa a bone mo phuthegong ya ga gabô go le teng ba ba ka dumêllanang le ênê, wa ba tlhotlheletsa go bua bosula ka kérékê mme ba tswa ba itirêla ya bôna ya maitirêlô.

(b) *Melato* : Ba bangwe ya re fa Mokresete a tlodile e ngwe ya ditaolô tsa Modimo e re fa a supediwa phôsô ya gagwê gore a e ikwatlhâélê, ênê a be a tlogêla kérékê ya gagwê a ya go inêela mo kerekeng e ngwe e e sa reng sepê ka melato ya motho yoo. Fa a fitlha o amogêlwa ka thabô o tsholwa mo kôpanong ya Selalêlô sa Morêna. Mme o néêlwa tirêlô mo kerekeng. Ó bile o belêllwa fa yôna Kérékê e a duleng mo go yôna e se molemô, e latlha batho ; mme a dirwe mogogi gongwe moevangedi gongwe moruti.

(c) *Melato ya Dikabêlô tsa Kérékê* : Ba bangwe ba tlogêla dikérékê tsa bôna ka go se lefe dikabêlô tsa kérékê. E re ka le tsôna dikérékê di sa tshwane ka go amogêla dikabêlô, (tse dingwe dikérékê di se ke di botsa bakresete ba dikérékê tsa tsôna tsa fa ba sa lefa dikabêlô tsa dikérékê, mme ka moo ba itunne ka dikabêlô tseo ka dinyaga tse dintsî), mme e re fa ênê Mokresete yoo a lemoga fa melato ya dikabêlô tseo e setse e le mentsi fa e ka lefiwang ka kgomo, jaanong a tswe ka setu, a ineele kérékê e ngwe. Mme le yôna kérékê eo, e amogelete fêla go se na sepê sa lekwalô mo go ênê. Mme batho bao ba ba duleng mo dikerekeng tsa bôna go se na lebaka, ba amogêlwa mo dikerekeng tse dingwe go se na lebaka, mme ba dirwe badiredi go se na lebaka. Le mo kerekeng tse di ba amogetseng go se na lebaka, ba tla di tlogêla go se na lebaka ; mme kwa bofelong, ba tla itirêla kérékê tsa maitirêlô le baruti ba maitirêlô Mme tsôna dikérékê tsa mohuta oo, ga se tsôna tse go ka solofê-

Iwang gore di tla fitlhisa ba-Afrika mo kitsong ya nnete ya Bokresete le ya Botswêlêlô-pele.

(d) *Tsholô e mpc* : Ke boletse mekgwa e e dirang dikérékê le baruti ba maitirêlô ba ma-Afrika. Mme jaanong ke tla tlhagisa se sengwe, se le sôna se ntseng se isa lengopeng la maitirêlô ; mme sôna ga se diriwe kê ba-Afrika ba ba se nang kitsô, mme se diriwa ké ba ba nang le kitsô e kgolo.

Fa rrago a opiwa ké tlhôgô, mme wêna O boifa go bolêlla ngaka O re : “ e ka e kete ke tlötolla rrê fa nka re ‘ o a lwalâ,’ ” mme ngaka e lesa fêla ka ga e itse ka ga bolwetsi ; fa rrago aka swa ka go tlhôka thusô ya ngaka, molato e tla nna wa ga mang fa ngaka e sa thusa ka ntsha ya Gago ? Etswe fa O ka be O boleletse ngaka Wa re, “ Rrê o opiwa ké tlhôgô,” ngaka e ka be mo neile setlhare sa tlhôgô. Mme fa se ka be se fodisitse monna-mogolo, go ne go tla nna boitumêlô mo go rrago le mo go wêna ngwana le go ngaka.

Se sengwe se le sôna se senyang dikérékê ké “ Tsholô e mpe ” e baruti ba bangwe ba tsholang badiredi gongwe bathusi ba bôna mo tirelong ya Modimo ka yôna. Ba tsholwa fêla go sa lebiwe ditirô tsa bôna, mme go lebilwe mmala o o mo letlalong la bôna. Mme le fa ba lekile ka boikanyô jotlhe go dirêla dikérékê tsa bôna ka dithata tsotlhe tsa mebele le tsa meya ya bôna, ka dinyaga tse di ka balwang ka masomê, le fa ditirô tse ba di diretseng kérékê ya bôna di bônala, le fa go ntse jalo, baruti bao bôna ba lebile boêmô jo bogolo ja tlolêgô ya bôna, le boêmô jo bobôtlana ja nyatsêgô ja bathusi ba bôna. Mme le fa ba bala lefoko le le reng, “ Yo o rérang Evangedi o tla phela ka Evangedi,” le fa go ntse jalo, ga ba dumele fa Lefoko leo le ka be le raya le mo-Afrika. Gapê fa bathusi bao ba bôna ba tsafala ba ntse ba le mo tirelong ya kérékê ya bôna, ga go thusô epê e e dirêlwang batho bao ba tsotaletseng mo tirelong.

Ké jôna bolwetsi ja tlhôgô jo bo bolayang bo-Ntatarona ba bangwe ; mme a re kopeng Ngaka e leng Modimo gore E ba alafê ba fôlê, gobane ba baša fa ba bone ka fa borrabô ba diretseng dikérékê tsa bôna ka teng, mme ba bôna ka fa baruti ba ba tshotseng ka teng, ba tla reng ? A ga ba kitla ba tlhôkêla baruti boikanyô, ka ba tla be ba supa se ba se boneng ka bo-rrabô ? Mme e tla re fa di *ou osse*, e leng badiredi ba ba tsfetseng, ba swa go tla bônawa kae di *jong osse*, makau a a ka dumêlang go tsêna mo Tirelong ya Modimo, fa bolwetse jo bo sa fole ?

Badumedi ba gaetsho ! A re yeng kwa Ngakeng :
“*Morekô ga o ithekole.*”

“ Ngaka ya me O nkafalafê
O mphodisê matlhokong ;
O mphê ’tlhare sa bophelô—
A se nthusê molatong
E le ôna o o tswang
Ditlolong tsa ga Adam ;
Ngaka ! A ke bônê more
Mo go Wêna wa mmaparure.”